

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI ISNIN : 14 OKTOBER 2019

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN TEH KOK LIM [TAIPING]

TARIKH : 14 OKTOBER 2019 (ISNIN)

SOALAN

TUAN TEH KOK LIM [TAIPING] minta **MENTERI KOMUNIKASI DAN MULTIMEDIA** menyatakan rancangan pihak Kementerian dalam kesediaan pelaksanaan teknologi jalur 5G.

JAWAPAN

Tuan Yang di-Pertua,

1. Untuk makluman Ahli Yang Berhormat, Pasukan Petugas Khas 5G Negara telah ditubuhkan pada bulan November 2018 yang lalu. Pasukan Petugas Khas 5G Negara terdiri daripada empat kumpulan kerja iaitu Kumpulan Kerja Perkara Bisnes, Kumpulan Kerja Infrastruktur, Kumpulan Kerja Pengurusan dan Peruntukan Spektrum dan yang terakhir Kumpulan Kerja Kawalselia
2. Kumpulan-Kumpulan Kerja ini yang terdiri daripada wakil sektor awam dan swasta telah ditugaskan untuk mengkaji strategi pelaksanaan 5G yang holistik dengan analisis daripada perspektif yang memfokuskan kepada cadangan penyelesaian kepada kekangan undang-undang dan kerangka kawalselia yang berkaitan, sokongan untuk infrastruktur, cadangan pelan ketersediaan sumber spektrum dan langkah-langkah untuk perlindungan pengguna.
3. Kini, Pasukan Petugas Khas 5G Negara berada dalam fasa terakhir iaitu melengkapkan laporan sebelum diserahkan kepada Kerajaan di dalam suku keempat 2019.

SOALAN NO : 1

4. Kementerian melalui Suruhanjaya Komunikasi dan Multimedia Malaysia (SKMM) seterusnya akan mengkaji laporan terbabit sebelum dibawa ke Kabinet untuk membolehkan pelaksanaan perkhidmatan 5G berada pada tahap yang terbaik.
5. Selain daripada itu, Kementerian juga membuat sesi libat urus pada bulan Jun 2019 yang lepas dengan menjemput semua Kementerian, agensi Kerajaan serta pihak swasta berkaitan seperti Malaysia Productivity Corporation, SME Corporation Malaysia, dan lain lain bagi mengenalpasti keperluan, selain cabaran yang dihadapi oleh Kerajaan di dalam melaksanakan teknologi dan ekosistem 5G di peringkat Kerajaan.
6. Pada 30 September 2019 baru-baru ini, pihak Kementerian melalui SKMM telah mengumumkan Pelaksanaan Projek Demonstrasi 5G Malaysia (5GDP) dalam satu majlis taklimat kepada media bertempat di Ibu Pejabat SKMM, Cyberjaya. Projek ini bertujuan untuk memudah cara, membina dan memupuk pembangunan kes-kes penggunaan 5G (5G use cases), dengan izin, yang berpotensi di dalam persekitaran sebenar dan konteks yang lebih luas untuk mengembangkan ekosistem 5G.
7. Projek Demonstrasi 5G Malaysia akan dilaksanakan selama enam (6) bulan bermula dari bulan Oktober 2019 sehingga Mac 2020 oleh lapan (8) buah syarikat yang akan membangunkan 55 kes-kes penggunaan 5G di enam (6) negeri iaitu Kedah, Perak, Pulau Pinang, Selangor, Terengganu dan Wilayah Persekutuan Kuala Lumpur. Kes-kes penggunaan 5G ini meliputi sembilan (9) vertikal iaitu Bandar Pintar, Hiburan/Media, Pendidikan, Penjagaan Kesihatan Digital, Minyak dan Gas, Pembuatan dan Industri Pemprosesan, Pengangkutan Pintar, Pertanian dan Pelancongan.
8. Projek Demonstrasi 5G Malaysia yang dilaksanakan ini juga merupakan langkah kesediaan negara bagi pelaksanaan teknologi 5G dimasa terdekat ini. Syarikat-syarikat yang terlibat dalam Projek Demonstrasi 5G Malaysia antaranya adalah Altel Communications Sdn Bhd, Celcom Axiata Bhd, Digi Telecommunications Sdn Bhd, edotco Malaysia Sdn Bhd, Maxis Bhd, Telekom Malaysia Bhd, U Mobile Sdn Bhd dan Petrolia Nasional Bhd.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD MARZUK BIN SHAARY
[PENGKALAN CHEPA]**

TARIKH : 14 OKTOBER 2019 (ISNIN)

SOALAN NO. 2

TUAN AHMAD MARZUK BIN SHAARY [PENGKALAN CHEPA] minta **MENTERI KESIHATAN** menyatakan adakah Kementerian bercadang untuk menguatkuasakan larangan penjualan rokok elektronik dan "Vape" secara menyeluruh ataupun membendung jualan bahan berkenaan terutamanya dalam kalangan pelajar sekolah memandangkan bahaya bahan itu daripada aspek kesihatan.

JAWAPAN

Yang di-Pertua,

Rokok elektronik atau Vape merupakan sejenis produk merokok yang baru di masa kini. Masalah penggunaan rokok elektronik atau Vape di Malaysia telah bermula seawal tahun 2013 dan telah memuncak penggunaannya di Malaysia pada tahun 2016. Masalah ini bukan sahaja berlaku di Malaysia malahan ia juga merupakan satu epidemik global yang mengundang kebimbangan pelbagai pihak.

Rokok elektronik atau vape yang menggunakan cecair bernikotin telah dikawal di bawah Akta Racun 1952. Di bawah Akta ini, sebarang persediaan yang mengandungi nikotin termasuk cecair rokok elektronik adalah dilarang penjualannya kecuali oleh ahli farmasi berlesen dan

pengamal perubatan berdaftar. Mana-mana orang selain daripada mereka yang disebut di atas yang menjual sebarang persediaan yang mengandungi nikotin termasuk cecair rokok elektronik bernikotin adalah melakukan satu kesalahan dan boleh didenda tidak melebihi RM3,000 atau penjara tidak melebihi satu tahun atau kedua-duanya sekali. Pada masa yang sama pengedaran dan pembekalan sebarang persediaan mengandungi nikotin memerlukan pendaftaran dan kelulusan sebagai ubat daripada Pihak Berkuasa Kawalan Dadah, di bawah peruntukan Peraturan-Peraturan Kawalan Dadah dan Kosmetik 1984, Akta Jualan Dadah 1952. Mana-mana orang yang mengedar atau membekalkan sebarang persediaan yang mengandungi nikotin tanpa kelulusan adalah melakukan satu kesalahan dan boleh dihukum dengan denda tidak melebihi RM25,000.00 atau penjara tidak melebihi tiga tahun atau kedua-duanya sekali.

Yang Di-Pertua,

Bagi rokok elektronik atau vape yang menggunakan cecair tanpa nikotin akan dikawal di bawah Akta Baru yang telah digubal di bawah pihak Kementerian Kesihatan Malaysia bersama-sama Kementerian Perdagangan Dalam Negeri dan Hal-Ehwal Pengguna (KPDNHEP) yang kini sedang dalam semakan pihak Jabatan Peguam Negara. Di bawah Akta Baru ini penggunaan semua jenis produk merokok seperti rokok konvensional dan rokok elektronik atau vape bagi mereka yang berumur di bawah 18 tahun adalah dilarang sama sekali. Menyedari terdapat kajian-kajian terkini yang telah menunjukkan kesan sampingan terhadap penggunaan rokok elektronik dan vape termasuk beberapa kematian yang telah dicatatkan di negara Amerika Syarikat, satu kajian terperinci perlu dibuat untuk mengkaji semula keperluan menguatkuasakan larangan penjualan rokok elektronik dan vape secara menyeluruh. Satu Jawatankuasa Kerja Pakar telah ditubuhkan dan dipengerusikan oleh Timbalan Menteri Kesihatan yang akan mengkaji semula bentuk kawalan yang akan diambil.

Sekian, terima kasih.

**MESYUARAT KETIGA, PENGGAL KEDUA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN
DARIPADA : YB TUAN HAJI AHMAD BIN HASSAN
KAWASAN : PAPAR
TARIKH : 14 OKTOBER 2019 (ISNIN)

SOALAN :

YB TUAN HAJI AHMAD BIN HASSAN minta **MENTERI KERJA RAYA** menyatakan berapa lagi pakej kerja-kerja pembinaan Pan Borneo yang belum dilaksanakan sewaktu penyerahan penyeliaan kepada Kementerian Pembangunan Infrastruktur Sabah.

JAWAPAN :

Tuan Yang Di-Pertua,

Untuk makluman Ahli Yang Berhormat, perancangan projek Lebuhraya Pan Borneo Sabah pada peringkat awalnya telah dibahagikan kepada 3 fasa pelaksanaan. Di bawah perjanjian PDP yang dimeterai pada tahun 2016, pelaksanaan projek LPB Sabah hanya melibatkan pembinaan fasa 1 sahaja, iaitu sepanjang 706km dan ia telah dipecahkan kepada 35 pakej.

Sehingga 21 September 2019 - iaitu selepas penamatan Perjanjian PDP projek Lebuhraya Pan Borneo Sabah - hanya 12 pakej sahaja daripada 35 pakej fasa 1 yang telah diawadkan kepada kontraktor. Daripada 12 pakej itu, 1 pakej telah pun ditamatkan kontrak akibat daripada ketidakmampuan pihak kontraktor, iaitu pakej 15: dari Tawau ke Semporna.

Manakala progres kemajuan bagi 11 pakej lagi yang sedang berjalan ialah antara 6 peratus hingga 60 peratus. Secara keseluruhan projek Lebuhraya Pan Borneo Sabah telah mencapai kemajuan 21.3 peratus berbanding 44.4 peratus (mengikut jadual) sehingga tarikh perjanjian PDP ditamatkan pada 21 September 2019.

Untuk makluman Ahli Yang Berhormat, di samping 12 pakej yang telah diluluskan itu, Kerajaan juga bersetuju meluluskan 3 lagi pakej yang baharu, iaitu melibatkan pakej 28, 29 dan 30 iaitu naik taraf laluan antara persimpangan Telupid ke persimpangan Beluran dengan jarak hampir 60km dan kos keseluruhan projek sebanyak RM980 juta. Ketiga-tiga pakej itu dijangka akan ditender pada suku pertama tahun hadapan (2020).

Manakala untuk baki pakej fasa 1 yang masih belum ditender - iaitu 20 pakej lagi, ia akan dilaksanakan dalam tempoh RMKe-12 (2021-2025), tertakluk kepada kelulusan peruntukan dari Agensi Pusat.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT MESYUARAT KETIGA,
PENGAL KEDUA, PARLIMEN KEEMPAT BELAS**

PERTANYAAN : LISAN

**DARIPADA : DATUK HALIMAH BINTI MOHAMED
SADIQUE [KOTA TINGGI]**

TARIKH : 14 OKTOBER 2019 (ISNIN)

SOALAN NO. 4

minta **MENTERI PEMBANGUNAN USAHAWAN** menyatakan apakah perancangan dan program yang dirancang oleh Kementerian Pembangunan Usahawan yang bersifat “High Impact” untuk merealisasikan Dasar Keusahawanan Negara yang baru dilancar pada Julai 2019 tercapai dengan jayanya.

JAWAPAN

Yang di-Pertua,

1. Dasar Keusahawanan Nasional 2030 (DKN2030) menggariskan strategi jangka panjang bagi menetapkan hala tuju pembangunan keusahawanan negara dalam menjadikan Malaysia sebagai sebuah Negara Keusahawanan Unggul menjelang tahun 2030.
2. Keutamaan DKN2030 adalah untuk mewujudkan ekosistem keusahawanan yang dinamik bagi memastikan semua golongan dan lapisan masyarakat di negara ini dapat memanfaatkan dan meneroka sepenuhnya potensi masing-masing untuk melibatkan diri secara serius dalam bidang keusahawanan.
3. Tumpuan juga diberikan untuk meningkatkan bilangan usahawan yang berkualiti, berdaya maju, berdaya tahan, berfikiran global dan kompetitif di samping mempertingkatkan keupayaan perusahaan mikro, kecil dan sederhana serta koperasi.
4. Di antara bidang yang diberi keutamaan di bawah DKN2030 adalah untuk meningkatkan keupayaan dan prestasi usahawan dalam sektor-sektor yang berpotensi dan berpertumbuhan tinggi seperti aeroangkasa, automotif, rel, tenaga boleh diperbaharui, peranti perubatan, bioteknologi dan industri halal.
5. Selaras dengan aspirasi DKN2030, Kementerian Pembangunan Usahawan (MED) telahpun mengorak langkah dengan meneroka industri yang memberi **impak yang tinggi** kepada usahawan tempatan. Antara inisiatif utama yang telah dilaksanakan oleh MED ialah:

Industri Halal

- (i) Melalui Mesyuarat Jemaah Menteri bertarikh 21 Ogos 2019, MED telah diberi mandat bagi membangunkan industri Halal dan menerajui Jawatankuasa Pembangunan Industri Halal yang baharu ditubuhkan. MED komited dalam usaha

NO. SOALAN : 4

meneroka ruang dan peluang bagi membangunkan usahawan tempatan dalam industri halal dan telah memulakan langkah untuk menjadikan Malaysia sebagai pembekal gelatin halal bagi pasaran global. Pelaksanaan inisiatif ini akan mengurangkan import gelatin halal sebanyak 30% sekaligus dapat meningkatkan peluang Perusahaan Kecil dan Sederhana (PKS) untuk terlibat secara kompetitif di dalam rantai bekalan (*supply chain*).

- (ii) MED memainkan peranan dalam memudahkan proses dan prosedur bagi usahawan tempatan memenuhi kriteria untuk mengeksport produk halal ke pasaran antarabangsa. Penganjuran Malaysia Halal Expo 2019 (MHE2019) yang diadakan pada awal tahun ini misalnya berjaya merekod jualan sebanyak RM135.04 juta hasil *business matching* di antara 21 syarikat *anchor* dengan 144 pempamer yang terdiri daripada PKS tempatan.
- (iii) Usaha akan dipergiatkan lagi sempena Sukan Olimpik Tokyo 2020 bagi memberi peluang kepada PKS tempatan mendapat akses yang lebih luas untuk mempromosi produk dan perkhidmatan.

Industri Aeroangkasa

- (i) Selaras dengan DKN2030, MED melalui SME Corporation dalam usaha untuk membangunkan industri aeroangkasa yang telah dikenal pasti sebagai industri yang memacu ekonomi negara ke tahap yang lebih tinggi melalui Program *Aerospace Manufacturing Initiative: Developing SMEs in Global Aerospace Manufacturing Industry* (AMI) yang bertujuan untuk membangunkan PKS tempatan menjadi sebahagian daripada rantai bekalan industri aeroangkasa.
- (ii) Sehingga September 2019, sebanyak tiga puluh (30) PKS telah menyertai program AMI dan sebanyak RM58.9 juta jumlah jualan telah dijana.

- (iii) Dengan pelaksanaan program AMI ini, ianya dilihat mampu membuka peluang kepada PKS untuk meneroka pasaran perniagaan berskala sederhana dan besar termasuk menjadi pengedar utama kepada syarikat aeroangkasa berpengaruh di dunia seperti Boeing, Airbus, Bombardier, Mitsubishi, Kawasaki dan lain-lain.

Program Pembangunan Vendor (PPV)

- (i) Di bawah Perbelanjaan Pembangunan Waran Am Bil.1 Tahun 2019 bertarikh 19 Disember 2018, MED telah dipertanggungjawabkan untuk melaksanakan program PPV dalam usaha memperkasa ekonomi usahawan Bumiputera.
- (ii) Pelaksanaan PPV di bawah MED diperkukuhkan melalui usaha meningkatkan penyertaan *anchor* baharu dari kalangan *Government Linked Company* (GLC), *Multinational Company* (MNC), *Public Limited Company* (PLC), juara vendor dan syarikat swasta.
- (iii) Pembangunan vendor tempatan turut meliputi pembangunan kapasiti melalui program peningkatan kemahiran serta pembangunan penyelidikan bagi tujuan pengkomersialan produk di peringkat tempatan dan antarabangsa.
- (iv) Antara sektor yang kini diberi keutamaan di dalam program PPV meliputi sektor aeroangkasa, telekomunikasi, bioteknologi, farmaseutikal, rel, tenaga boleh baharu, automotif, *air mobility* dan yang terbaru menggalakkan vendor dalam pembuatan aset industri pertahanan. Perbincangan turut telah dibuat bersama Kementerian yang terlibat berkaitan perkara ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS (2019)**

PERTANYAAN : LISAN

**DARIPADA : YB DATO' SERI HAJI MUKHRIZ BIN TUN
DR. MAHATHIR [JERLUN]**

TARIKH : 14 OKTOBER 2019

SOALAN

Minta **MENTERI PELANCONGAN, SENI DAN BUDAYA** menyatakan usaha untuk mempromosi tarikan pelancongan di negeri-negeri, khususnya yang berkaitan dengan alam semulajadi, contohnya hutan simpan, gunung, gua dan jeram yang terdapat di kawasan pedalaman negeri. Bagaimana negeri-negeri yang di luar “laluan pelancongan” mendapat manfaat daripada Tahun Melawat Malaysia 2020.

JAWAPAN

Tuan Yang di-Pertua,

Untuk Makluman Ahli Yang Berhormat, Kementerian melalui Tourism Malaysia aktif dalam mempromosikan destinasi dan produk pelancongan yang menarik, baru dan masih belum diterokai termasuklah segmen pelancongan alam semulajadi. Antara promosi yang dilaksanakan turut meliputi promosi antarabangsa melalui penyertaan pameran pelancongan dan aktiviti promosi oleh Pejabat Tourism Malaysia di luar negara. Tourism Malaysia turut menjemput negeri-negeri untuk mempromosikan dan memperkenalkan produk pelancongan yang baru dan unik untuk dipromosi dan dipakejkan dengan pengusaha pelancongan di dalam dan luar negara.

Tuan Yang di-Pertua,

Sebagai sebuah negara yang kaya dengan keindahan alam semula jadi yang sebahagian besarnya berkedudukan di kawasan pedalaman dan di luar laluan pelancongan biasa, Kementerian Pelancongan, Seni dan Budaya telah merangka Pelan Ekopelancongan Kebangsaan 2016-2025 sebagai hala tuju dalam memperkukuhkan pembangunan segmen ekopelancongan dan memastikan kelestarian produk ekopelancongan di seluruh negara.

Sememangnya menjadi misi dan visi Kementerian ini memastikan tiada negeri atau kawasan pelancongan yang terpinggir daripada inisiatif promosi pelancongan termasuk segmen pelancongan unik bagi negeri-negeri di luar “laluan pelancongan” biasa atau “*off-the beaten-track*” agar turut mendapat faedah dan manfaat daripada industri ini khususnya sempena Tahun Melawat Malaysia 2020.

Antara segmen yang diketengahkan adalah seperti “*birdwatching*” yang terdapat di Kuala Gula Bird Sanctuary (Perak), Timah Tasoh Dam di Taman Negeri Perlis, Teluk Air Tawar (Pulau Pinang), Panti Bird Sanctuary (Johor) dan Fraser’s Hill.

NO. SOALAN : 5

Segmen *abseiling* dan *whitewater rafting* juga dipromosikan dengan pakej-pakej khas oleh pengusaha-pengusaha pelancongan tempatan, contohnya di Ulu Geruntum, Gopeng. Bagi menambah nilai kepada pakej pelancongan ini, aktiviti “*caving*” di Gua Tempurung turut ditawarkan.

Selain itu, produk minat khas ‘*angling*’ memancing khususnya di laut dalam turut merupakan tarikan bagi pelancong asing untuk datang ke destinasi yang dianggap “*off-the beaten-track*”. Pelancongan sukan memancing ini mempunyai nilai faedah yang tinggi dan lestari (*high-value and sustainable touristic activity*) di mana pelancong-pelancong ini berbelanja lebih tinggi berbanding dengan pelancong biasa. Ia turut menyumbang kepada pendapatan nelayan tempatan melalui penyewaaan bot dan lain-lain perbelanjaan kepada penduduk setempat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN AHMAD JOHNIE BIN ZAWAWI [IGAN]

TARIKH : 14.10.2019 (SELASA)

SOALAN

minta **MENTERI PEMBANGUNAN LUAR BANDAR** menyatakan berapa jumlah rumah PPRT yang telah dibina di kawasan Parlimen Igan untuk tahun 2019 serta kos yang terlibat. Berapakah lagi yang dalam perancangan akan di bina baru dan apakah kriteria untuk mendapatkan rumah berkenaan.

JAWAPAN

Tuan Yang di-Pertua,

1. Untuk makluman jumlah Program Perumahan Rakyat Termiskin (PPRT) yang telah diperuntukkan bagi Parlimen Igan pada tahun 2019 adalah sebanyak 13 unit bina baharu dan 76 unit baik pulih melibatkan peruntukan sebanyak RM2.204 juta.
2. Daripada jumlah tersebut sebanyak 2 unit bina baharu dan 28 unit baik pulih telah siap sepenuhnya. Manakala, 11 unit bina baharu dan 48 unit baik pulih masih dalam pelbagai peringkat pelaksanaan dan dijangka selesai pelaksanaan selewat-lewatnya pada akhir tahun 2019.
3. Kriteria kelayakan penerima bantuan adalah seperti yang digariskan dalam tatacara pelaksanaan PPRT iaitu disahkan sebagai miskin tegar atau miskin berdasarkan Pendapatan Garis Kemiskinan (PGK) semasa yang berkuat kuasa serta mempunyai pemilikan penuh tapak rumah atau mendapat kebenaran bagi kes menumpang tanah milik orang lain/ tanah milik sebahagian.

Sekian, terima kasih.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

DARIPADA : TUAN CHAN FOONG HIN [KOTA KINABALU]

TARIKH : 14 OKTOBER 2019

SOALAN

TUAN CHAN FOONG HIN [KOTA KINABALU] minta **MENTERI LUAR NEGERI** menyatakan sejauh manakah penyediaan Kerajaan berhadapan dengan cabaran dan peluang baru susulan tindakan negara jiran Indonesia yang bakal memindahkan ibu negara dari Jakarta ke Kalimantan. Bagaimana Kerajaan bercadang untuk memastikan negara kita bermanfaat daripada pemindahan ibu negara Indonesia, terutamanya untuk Sabah dan Sarawak.

PEMBERITAHUAN BERSEKALI PERTANYAAN BAGI JAWAB LISAN

PERTANYAAN : JAWAB LISAN

DARIPADA : TUAN LARRY SOON @ LARRY SNG WEI SHIEN [JULAU]

TARIKH : 23 OKTOBER 2019

SOALAN

TUAN LARRY SOON @ LARRY SNG WEI SHIEN [JULAU] minta **MENTERI LUAR NEGERI** menyatakan apakah pendirian Kerajaan berhubung pemindahan ibu negara Indonesia ke Kalimantan Timur seperti yang diumumkan oleh Presiden Joko Widodo.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Kota Kinabalu di atas pertanyaan yang dikemukakan.

Tuan Yang di-Pertua,

2. Izinkan saya menjawab pertanyaan Yang Berhormat Kota Kinabalu bersekali dengan pertanyaan yang dikemukakan oleh Yang Berhormat Julau bertarikh 23 Oktober 2019, kerana pertanyaan-pertanyaan tersebut menyentuh isu yang sama.

3. Untuk makluman Dewan yang mulia, pada 26 Ogos 2019, Presiden Republik Indonesia telah mengumumkan pemilihan Kalimantan Timur sebagai ibu kota baharu Indonesia bagi menggantikan Jakarta. Pembangunan ibu kota tersebut dijangka akan dimulakan pada tahun 2020 dan proses pemindahan akan dilakukan pada tahun 2024.

Tuan Yang di-Pertua,

4. Kerajaan percaya bahawa keputusan untuk memindahkan Ibu Kota pentadbiran dari Jakarta ke Kalimantan Timur, Indonesia adalah berdasarkan kepentingan negara mereka.

5. Tidak dapat dinafikan bahawa akan terdapat implikasi-implikasi kepada negara kita Malaysia. Kerajaan percaya ianya tidak akan menjejaskan hubungan dua hala yang semakin kukuh antara Malaysia – Indonesia.

6. Pemindahan ibu kota baharu ke Kalimantan Timur akan meningkatkan kegiatan ekonomi, menambahkan jumlah populasi dan juga kegiatan-kegiatan lain sepertimana yang didapati di sesebuah Ibu Kota. Ini boleh memberikan banyak manfaat kepada negeri-negeri Malaysia terutamanya Sabah dan Sarawak. Ia juga boleh membawa cabaran-cabaran baru. Pemindahan ini akan merancakkan lagi ekonomi

di pulau berkenaan dan Sabah dan Sarawak boleh mendapat limpahan manfaat daripada pelbagai sudut aliran perdagangan di sempadan antarabangsa antara Kalimantan dengan negeri-negeri Malaysia berkenaan.

7. Selain itu, sektor pelancongan di Sabah dan Sarawak juga dijangka akan meningkat berikutan jarak yang dekat antara Kalimantan dengan kedua-dua negeri tersebut.

8. Pemindahan ini juga dijangka boleh membuka banyak peluang baru bagi meningkatkan kerjasama ekonomi antara Malaysia dan Indonesia, khususnya bagi wilayah-wilayah di Borneo dengan penglibatan syarikat-syarikat pemaju dan kontraktor Malaysia yang mengambil bahagian dalam projek pembangunan di Kalimantan Timur.

Tuan Yang di-Pertua,

9. Sebagai jiran yang rapat dan terdekat, Malaysia sentiasa bersedia untuk berkongsi pengalaman dan kepakaran dengan Indonesia jika diperlukan, berdasarkan pengalaman kita memindahkan pusat pentadbiran Malaysia dari Kuala Lumpur ke Putrajaya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA,
PENGAL KEDUA, PARLIMEN KE-14 (2019)**

PERTANYAAN : LISAN

**DARIPADA : YB DATO' SERI DR. SHAHIDAN BIN
KASSIM [ARAU]**

TARIKH : 14 OKTOBER 2019

SOALAN

Minta **MENTERI PELANCONGAN, SENI DAN BUDAYA** menyatakan :-

- a) apakah strategi serta cadangan yang akan dilakukan oleh Kementerian bagi mempromosikan lagi sektor pelancongan di Perlis; dan
- b) apakah pihak Kementerian akan memberi bantuan membaikpulih penyelenggaraan kawasan pelancongan ini khususnya di Tasik Meranti, Bukit Air dan Wang Kelian kerana semua bangunan ini dibiayai oleh Kerajaan yang sekarang ini semakin terbiar serta adakah kerajaan bercadang untuk mengambil tindakan terhadap kerajaan negeri yang gagal menyelenggarakan tempat-tempat pelancongan kerana terdapat tempat pelancongan yang tidak pernah digunakan langsung sejak ia mula dibina seterusnya menjadi projek "Gajah Putih".

JAWAPAN

Tuan Yang di-Pertua,

Kementerian Pelancongan, Seni dan Budaya melalui Tourism Malaysia sentiasa komited dalam memasarkan dan mempromosikan sektor pelancongan negara terutamanya negeri Perlis melalui strategi dan inisiatif seperti berikut:

- 1) **Melalui pelaksanaan program *Mega-Fam (Mega Familiarization)*** dengan mempelawa wakil-wakil media dan para pengusaha pelancongan antarabangsa untuk menyertai acara-acara dan program-program pelancongan di Perlis;
- 2) **Mengadakan bengkel pembangunan pakej serta seminar** bagi membantu pengusaha pelancongan termasuklah pengusaha homestay berdaftar untuk membangun dan mempromosikan pakej-pakej yang lebih menarik dan berdaya maju kepada pelancong domestik dan antarabangsa;
- 3) **Membawa masuk krew-krew penggambaran televisyen untuk membuat liputan serta membuat penggambaran untuk mempromosi produk pelancongan** yang terdapat di Negeri Perlis;
- 4) **Melibatkan penyertaan Kerajaan Negeri dan agensi pelancongan di Perlis melalui misi jualan/pemasaran dan pameran-pameran pelancongan utama dalam negara dan antarabangsa;**
- 5) **Membantu mendapatkan gambar-gambar dan video berkualiti** melalui acara-acara serta produk pelancongan di negeri Perlis bagi tujuan **publisiti dan promosi dalam media sosial dan digital;** dan
- 6) **Menyebarkan maklumat mengenai produk pelancongan negeri Perlis kepada pelancong melalui Pejabat-pejabat Tourism Malaysia di seluruh negara.**

Selain itu, antara cadangan bagi mempromosikan sektor pelancongan di Negeri Perlis termasuklah mempromosikan acara-acara yang akan dilaksanakan seperti berikut :

Bil.	Nama Acara	Tarikh	Lokasi	Sasaran Peserta
1.	Pesta Angin Timur 2020	6-8 Mac 2020	Perkarangan Kompleks Dewan Undangan Negeri Perlis	100,000
2.	Perlis Marathon 2020	4 April 2020	Perkarangan Stadium Tuanku Syed Putra, Kangar	15,000
3.	Karnival Harumanis	April 2020	Busana@Menara Mara, Kuala Lumpur	5,000
4.	Pesta Air Kuala Perlis	September 2020	Kompleks Lembaga Kemajuan Ikan Malaysia, Kuala Perlis	20,000
5.	9th World Cup Woodball Championship 2020	24-30 Julai 2020	Dataran Dato' Sheikh Ahmad, Unimap, UITM dan Kolej Matrikulasi Perlis	3,000

Untuk makluman Ahli Yang Berhormat, peruntukan penyelenggaraan projek pelancongan tidak lagi disediakan di bawah Rancangan Malaysia Kesebelas (RMKe-11). Kementerian Pelancongan, Seni dan Budaya hanya menyalurkan peruntukan bagi melaksanakan pembangunan projek yang telah diluluskan oleh pihak Kementerian Hal Ehwal Ekonomi (MEA) dan membuat pemantauan sehingga

NO. SOALAN : 8

pelaksanaan projek siap seterusnya diserahkan kepada Agensi Pemilik. Sehubungan itu, tanggungjawab penyelenggaraan projek berkenaan adalah kepada agensi pemilik iaitu Pihak Berkuasa Tempatan (PBT) atau Agensi Kerajaan Negeri Perlis bagi memastikan kemudahan pelancongan tersebut terus boleh dinikmati oleh pengunjung.

Kementerian ini tidak mempunyai punca kuasa untuk mengambil tindakan terhadap Kerajaan Negeri yang gagal menyelenggarakan tempat-tempat pelancongan. Walau bagaimanapun, Kementerian mengambil kira faktor ini sebelum memperakukan sebarang permohonan projek baharu oleh Kerajaan Negeri untuk pertimbangan Kementerian Hal Ehwal Ekonomi (MEA).

Sekian, terima kasih.

**MESYUARAT KETIGA, PENGGAL KEDUA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN
DARIPADA : YB TUAN ALI ANAK BIJU
KAWASAN : SARATOK
TARIKH : 14 OKTOBER 2019 (ISNIN)

SOALAN :

YB TUAN ALI ANAK BIJU minta **MENTERI KERJA RAYA** menyatakan Pihak GPS sering membangkitkan isu tentang pembatalan oleh Kerajaan Persekutuan terhadap projek Jambatan Igan, Jambatan Batang Lupar dan Jambatan Rambungan. Apakah status sebenar pemohonan dan pelaksanaan jambatan-jambatan tersebut.

JAWAPAN :

Tuan Yang Di-Pertua,

Untuk makluman Ahli Yang Berhormat, cadangan pembinaan Jambatan Batang Lumar, Jambatan Igan dan Jambatan Rambungan di Sarawak berada di laluan Jalan Persisir Pantai Sarawak, iaitu berstatus Jalan Negeri.

Di bawah pentadbiran Kerajaan terdahulu, cadangan ketiga-tiga jambatan itu telah diluluskan di bawah RMKe-11 dengan kos masing-masing RM500 juta untuk Jambatan Batang Lumar (perkongsian kos 50:50 dengan Kerajaan Negeri); RM305 juta untuk Jambatan Igan, dan RM100 juta untuk projek membina Jambatan Rambungan.

Walau bagaimanapun, kelulusan pelaksanaan projek-projek berkenaan terpaksa disemak semula oleh Kerajaan semasa. Ini merujuk kepada keputusan Kerajaan yang membatalkan ketiga-tiga projek berkenaan di mana ia berasaskan fakta bahawa projek-projek itu terletak di bawah bidang kuasa Kerajaan Negeri. Dengan erti kata lain, ketiga-tiga jambatan tersebut bukanlah berstatus Jalan Persekutuan yang berada di bawah bidang kuasa langsung Menteri Kerja Raya.

Tuan Yang Di-Pertua,

Untuk makluman Ahli Yang Berhormat, Kementerian Kerja Raya mengambil maklum bahawa ketiga-tiga projek jambatan tersebut akan diteruskan pelaksanaannya oleh Kerajaan Negeri Sarawak dengan menggunakan peruntukan negeri. Sehubungan itu Kementerian Kerja Raya amat mengalu-alukan hasrat oleh Kerajaan Negeri itu demi kesejahteraan rakyat secara amnya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN ARTHUR JOSEPH KURUP
[PENSIANGAN]**

TARIKH : 14 OKTOBER 2019 (ISNIN)

SOALAN NO. 10

TUAN ARTHUR JOSEPH KURUP [PENSIANGAN] minta **MENTERI KOMUNIKASI DAN MULTIMEDIA** menyatakan apakah langkah untuk memastikan kawasan luar bandar Sabah khususnya kawasan kampung yang terpencil tidak terkecuali daripada menikmati talian komunikasi seperti telefon dan internet.

JAWAPAN

Tuan Yang di-Pertua,

1. Pihak Kerajaan sentiasa memberi tumpuan kepada pembangunan infrastruktur komunikasi yang komprehensif merangkumi penyediaan liputan jalur lebar talian tetap dan mudah alih yang dapat memberi perkhidmatan komunikasi yang lebih menyeluruh, stabil dan berkualiti di seluruh negara terutamanya di kawasan luar bandar dan pedalaman.
2. Melalui inisiatif yang dibiayai menerusi Kumpulan Wang Pemberian Perkhidmatan Sejagat (PPS), Peluasan Liputan Jalur Lebar Mudah Alih yang merangkumi pembinaan menara komunikasi baharu dan penaiktarafan menara komunikasi sedia ada dengan perkhidmatan jalur lebar mudah alih giat dilaksanakan. Setakat Ogos 2019, sebanyak 2,397 menara komunikasi baharu telah siap beroperasi di kawasan luar bandar di seluruh negara dan terdapat 249 menara komunikasi baharu

masih di peringkat pelaksanaan. Daripada jumlah tersebut, sebanyak 475 menara komunikasi baharu telah siap beroperasi di Sabah dan terdapat 41 menara lagi masih di peringkat pelaksanaan termasuklah pelaksanaan 36 menara komunikasi baharu dan 8 menara dalam peringkat pelaksanaan di Parlimen Pensiangan.

3. Pihak SKMM telah menaiktaraf sebanyak 5,128 lokasi menara kepada perkhidmatan 3G dan 4G, ini termasuklah 1,128 lokasi bagi Sabah. Manakala sebanyak 51 lokasi menara masih lagi dalam peringkat penaiktarafan di seluruh negara, termasuklah 15 lokasi bagi Sabah. Sebanyak 58 menara komunikasi sedia ada telah dinaiktaraf di Parlimen Pensiangan.

4. Selain itu, bagi inisiatif berkaitan peluasan Jalur Lebar Talian Tetap yang menyediakan perkhidmatan jalur lebar berkelajuan tinggi di kawasan pinggir dan luar bandar; lebih dari 620 ribu sambungan telah tersedia yang melibatkan penaiktarafan 572 ibusawat di seluruh negara, manakala baki 60 ribu sambungan masih dalam peringkat pelaksanaan yang dijangka siap secara berperingkat pada tahun 2019. Ini termasuklah lebih 45 ribu sambungan telah siap di Sabah dan baki 4,500 sambungan dalam peringkat pelaksanaan.

5. Antara inisiatif lain oleh Kerajaan untuk menyokong pemberi perkhidmatan untuk menyediakan perkhidmatan 4G adalah projek rangkaian teras gentian optik. Di Sabah, sepanjang 1,313 km gentian optik telah siap beroperasi dan digunakan untuk penyediaan perkhidmatan 4G.

6. Untuk memastikan liputan jalur lebar dapat disediakan kepada hampir semua penduduk, Pelan Gentian Optik dan Kesalinghubungan Negara (atau *National Fiberisation and Connectivity Plan*, ("NFCP")) mensasarkan 98% kawasan berpenduduk di Malaysia akan mendapat kelajuan purata 30Mbps menjelang tahun 2023 dengan menggunakan teknologi yang bersesuaian di seluruh negara.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS (2019)**

PERTANYAAN : LISAN

**DARIPADA : YB TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 14 OKTOBER 2019

SOALAN

Minta **MENTERI PELANCONGAN, SENI DAN BUDAYA** menyatakan jumlah peruntukan yang diberi Kerajaan kepada penggiat seni visual, seni tari dan seni persembahan pada tahun 2014-2018 serta jumlah kehadiran atau penonton bagi program-program seni yang diusahakan penerima-penerima peruntukan tersebut.

JAWAPAN

Tuan Yang di-Pertua,

Kementerian Pelancongan, Seni dan Budaya telah mewujudkan Bantuan Pentadbiran dan Kegiatan Persatuan-Persatuan Badan Bukan Kerajaan (NGO) Seni Budaya yang bertujuan membantu persatuan-persatuan tanpa mengira latar belakang kaum atau etnik dalam mengembangkan dan melestarikan seni, budaya dan warisan negara.

Bantuan ini boleh dipertimbangkan kepada badan NGO yang layak dan memenuhi garis panduan bantuan di bawah Jawatankuasa Panel Penilai Kebudayaan. Jumlah peruntukan yang diberikan dan jumlah kehadiran penonton bermula dari tahun 2014 hingga 2018 adalah seperti berikut:

Tahun	Jumlah Penerima	Jumlah Peruntukan (RM)	Jumlah Khalayak (Orang)
2014	228	6,000,000.00	122,800
2015	9	419,500.00	180,294
2016	35	958,070.00	185,610
2017	17	1,265,000.00	170,536
2018	28	2,669,700.00	217,000
JUMLAH	317	11,312,270	876,240

Selain itu, Kementerian ini melalui Jabatan Kebudayaan dan Kesenian Negara (JKKN) juga telah menyediakan Bantuan Bagi Melaksanakan Program-Program Kebudayaan kepada NGO Seni Budaya.

Jumlah peruntukan yang diberikan dan jumlah kehadiran penonton bermula dari tahun 2014 hingga 2018 adalah seperti berikut:

Tahun	Jumlah Peruntukan (RM)	Jumlah Kehadiran Penonton (Orang)
2014	3,591,161.64	387,237
2015	2,330,429.50	359,212
2016	2,092,911.00	222,881
2017	1,170,558.00	286,354
2018	795,000.00	302,279
JUMLAH	9,980,060.14	1,557,963

Bagi penggiat seni visual, Kementerian ini melalui Lembaga Pembangunan Seni Visual Negara (LPSVN) telah menyalurkan bantuan di bawah Tabung Bantuan Seni kepada persatuan seni visual dan artis-artis penggiat seni visual tanah air. Jumlah peruntukan yang diberikan bermula dari tahun 2014 hingga 2018 adalah seperti berikut:

Tahun	Jumlah Penerima	Jumlah Penyaluran (RM)
2014	40	397,542
2015	43	692,948
2016	1	20,000
2017	3	140,000
2018	13	175,500
JUMLAH	100	1,425,990

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN HAJI HASBI BIN HAJI HABIBOLLAH
[LIMBANG]**

TARIKH : 14.10.2019 (SELASA)

SOALAN

minta **MENTERI PEMBANGUNAN LUAR BANDAR** menyatakan bilakah pembinaan Jalan Meritam/Telahak/Buangabai/Pengkalan Rejab/Sungai Poyan Fasa 2 yang masih terbengkalai akan dimulakan kerana belum ada tanda-tanda untuk membuat "retender" bagi kali ke-3 dan jalan tersebut sudah lama terbiar begitu sahaja.

JAWAPAN

Tuan Yang di-Pertua,

1. Sepertimana Yang Berhormat sedia maklum, Projek Jalan Meritam/ Telahak/ Bong Abai/ Pengkalan Rejab (Fasa 2) telah diluluskan pelaksanaannya pada tahun 2010 dengan kos projek berjumlah RM3.49 juta. Skop projek ini adalah membina jalan sepanjang 5.85km spesifikasi JKR R3.

2. Jabatan Kerja Raya (JKR) Sarawak selaku agensi pelaksana projek ini melalui surat bertarikh 17 Januari 2019 telah menamatkan kontrak bagi Projek Jalan Meritam/ Telahak/ Bong Abai/ Pengkalan Rejab (Fasa 2) memandangkan kontraktor yang dilantik gagal menyiapkan projek tersebut sebagaimana yang dijadualkan. Pada masa ini status fizikal projek adalah 68.5% sebenar berbanding 100% jadual.

3. Untuk makluman Yang Berhormat jua, projek ini akan dilaksanakan secara arahan perubahan kerja (*Variation Order*) dengan Projek Jalan Meritam/ Telahak/ Buangabai, Limbang (Fasa 4). Pada masa kini, Kementerian sedang dalam proses bagi menyediakan kertas arahan Perubahan Kerja sebelum dikemukakan kepada Kementerian Kewangan untuk kelulusan selanjutnya.

4. Kerja-kerja penyiapan Projek Jalan Meritam/ Telahak/ Bong Abai/ Pengkalan Rejab (Fasa 2) ini dijangka akan dapat dimulakan pada bulan Februari 2020 dan jangka siap pada bulan Ogos 2020 dengan anggaran kos penyiapan sebanyak RM2.5 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA HAJAH MAS ERMIEYATI
BINTI SAMSUDIN [MASJID TANAH]**

TARIKH : 14 OKTOBER 2019 [ISNIN]

SOALAN NO. 13

Minta **MENTERI PERUMAHAN DAN KERAJAAN TEMPATAN** menyatakan perancangan untuk taman-taman perumahan mewujudkan jawatankuasa mereka sendiri memandangkan taman perumahan diletakkan di bawah kawal seliaan MPKK.

JAWAPAN

Tuan Yang di-Pertua,

1. Untuk makluman Yang Berhormat, secara dasarnya, penubuhan Majlis Pengurusan Komuniti Kampung (MPKK) adalah di kampung-kampung yang terletak di luar kawasan operasi Pihak Berkuasa Tempatan (PBT) dan perkara ini adalah di bawah bidang kuasa Kementerian Pembangunan Luar Bandar (KPLB). Namun begitu, penentuan persempadanan kampung bagi mewujudkan MPKK adalah tertakluk di bawah bidang kuasa Pihak Berkuasa Melantik Negeri iaitu pihak Kerajaan Negeri masing-masing.

2. Untuk makluman Yang Berhormat selanjutnya, Dasar Komuniti Negara (DKomN) di bawah Kementerian Perumahan dan Kerajaan Tempatan (KPKT) telah diluluskan oleh Jemaah Menteri pada 23 November 2018. Objektif DKomN adalah untuk mendaya-upayakan komuniti di kawasan perumahan kos rendah dan sederhana khususnya perumahan berstrata supaya terlibat secara aktif dalam usaha menyelenggara dan mengurus harta awam serta harta bersama.

3. Di bawah DKomN, Pejabat Sekretariat Muafakat Komuniti (SMK) akan ditubuhkan di Projek Perumahan Rakyat (PPR) yang terpilih. SMK ini merupakan platform untuk memudah cara dan menjalinkan hubungan antara komuniti (iaitu melalui persatuan penduduk) dengan agensi Kerajaan, pihak swasta serta Badan Bukan Kerajaan (NGO). Sebagai permulaan, sebanyak 20 buah PPR yang terlibat dengan penubuhan pejabat SMK di seluruh negara dan senarainya adalah seperti berikut:

BIL.	NEGERI	PPR TERPILIH
1.	Perlis	PPR Mukim Sena
2.	Kedah	PPR Paya Nahu 2, Sg. Petani
3.		PPR Taman Dahlia, Langkawi
4.	Pulau Pinang	PPR Taman Bagan Jaya, Butterworth
5.		PPR Taman Manggis, Georgetown
6.	Perak	PPR Paya Simpang Perdana, Taiping
7.		Rumah Pangsa Jalan Hospital, Ipoh
8.	Selangor	PPR Lembah Subang 2, Petaling Jaya
9.		PPR Lembah Subang 1, Petaling Jaya
10.	Negeri Sembilan	PPR Senawang
11.	Melaka	PPR Tehel

BIL.	NEGERI	PPR TERPILIH
12.	Johor	PPR Desa Mutiara, Tebrau
13.		PPR Kempas Permai, Tampoi
14.	Pahang	PPR Seri Kemuning, Temerloh
15.		Flat Perumahan Pak Mahat, Kuantan
16.	Terengganu	PPR Padang Hiliran, Kuala Terengganu
17.	Kelantan	PPR Kota Bharu
18.		PPR Gua Musang
19.	Sabah	PPR Telipok Ria, Tuaran, Kota Kinabalu
20.		PPR Taman Seri Keramat, Putatan, Kota Kinabalu

4. Buat masa ini, KPKT memfokuskan kepada penubuhan 20 buah pejabat SMK bagi membolehkan perancangan dan pelaksanaan aktiviti-aktiviti yang melibatkan komuniti di PPR dapat dilaksanakan dengan teratur seterusnya memberi manfaat kepada para penduduk di PPR tersebut. Pejabat SMK boleh bekerjasama dengan MPKK sedia ada di PPR tertentu bagi memastikan program-program bantuan dan inisiatif Kerajaan dapat disampaikan dengan lebih berkesan dan seterusnya memberi impak yang tinggi kepada komuniti di PPR tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

DARIPADA : DATUK ROBERT LAWSON CHUAT [BETONG]

TARIKH : 14.10.2019 (ISNIN)

SOALAN

minta **MENTERI PEMBANGUNAN LUAR BANDAR** menyatakan:

(a) berapa jumlah peruntukan yang telah diluluskan untuk Skim Pinjaman Rumah Panjang dari Kerajaan Persekutuan untuk Sarawak bagi tahun 2019; dan

(b) adakah Kerajaan bercadang untuk menambahkan dana tersebut memandangkan pertambahan permintaan dari masyarakat rumah Panjang Sarawak untuk Skim Pinjaman tersebut.

JAWAPAN

Tuan Yang di-Pertua,

1. Kementerian Pembangunan Luar Bandar tidak menawarkan skim pinjaman perumahan rumah panjang kepada mana-mana pihak pada masa ini. Bagi tahun sebelum ini, skim pinjaman perumahan untuk rumah panjang diuruskan oleh Kerajaan Negeri Sarawak melalui peruntukan daripada Jabatan Perdana Menteri. Sebarang penambahan peruntukan adalah tertakluk kepada keputusan Kerajaan Negeri Sarawak dan Jabatan Perdana Menteri.

2. Sebagai makluman, program bantuan Program Perumahan Rakyat Termiskin (PPRT) di bawah Kementerian Pembangunan Luar Bandar melibatkan dua skop bantuan iaitu bina baharu dan baik pulih dengan keutamaan kepada projek rumah individu. Manakala bagi rumah panjang, Kementerian hanya menumpukan kepada bantuan baik pulih PPRT sahaja dan dilaksanakan dengan kerjasama Pejabat Daerah. Sebanyak RM9.930 juta diperuntukan untuk bantuan baik pulih PPRT panjang daripada keseluruhan peruntukan baik pulih PPRT di Sarawak berjumlah RM29 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN WONG KAH WOH
[IPOH TIMUR]
TARIKH : 14 OKTOBER 2019 (ISNIN)

SOALAN NO. 15

Y.B. TUAN WONG KAH WOH [IPOH TIMUR] minta **MENTERI KEWANGAN** menyatakan setakat ini, jumlah faedah pinjaman untuk 1MDB yang telah dibayar oleh Kerajaan Persekutuan serta jumlah yang telah dikutip hasil daripada pengembalian wang yang berkaitan dengan 1MDB.

JAWAPAN

Tuan Yang di-Pertua,

Kerajaan bagi tempoh April 2017 hingga Mei 2019 telah menyalurkan bantuan kewangan kepada 1Malaysia Development Bhd (1MDB) sebanyak kira-kira **RM8.93 bilion** melalui Kementerian Kewangan dan syarikat Menteri Kewangan Diperbadankan (MKD) bagi tujuan pelunasan bayaran faedah pinjaman dan bayaran penyelesaian kepada International Petroleum Investment Company (IPIC).

Sehingga 30 September 2019, jumlah dana berkaitan 1MDB yang telah berjaya didapatkan kembali dan didepositkan ke dalam *Assets Recovery Account* di bawah Kementerian Kewangan dan 1MDB adalah sebanyak kira-kira RM925.1 juta (termasuk RM6.1 juta yang dipulangkan kepada Yayasan 1MDB). Dana ini telah diperoleh dalam pelbagai mata wang asing termasuk dolar AS, dolar Singapura, dolar Australia dan China Renminbi.

Jumlah tersebut tidak termasuk hasil jualan Kapal Equanimity sebanyak kira-kira USD126 juta (RM529.2 juta) yang telah diterima sepenuhnya pada 23 April 2019 dan kini disimpan di dalam *Sheriff's Stakeholder Account* bagi tujuan penyesuaian dengan tuntutan perbelanjaan penyelenggaraan kapal yang akan ditentukan melalui Perintah Mahkamah. Baki hasil jualan setelah ditolak jumlah perbelanjaan yang terlibat dijangka akan didepositkan ke dalam *Assets Recovery Account* pada suku tahun keempat tahun 2019.

Secara keseluruhannya, jumlah dana berkaitan 1MDB yang telah berjaya didapatkan kembali adalah sebanyak kira-kira RM1.45 bilion.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD. SALIM SHARIF
[JEMPOL]**

TARIKH : 14 OKTOBER 2019 [ISNIN]

SOALAN NO. 16

Minta **MENTERI PERUMAHAN DAN KERAJAAN TEMPATAN** menyatakan :-

- (a) penjelasan berhubung dakwaan Malaysia telah menjadi destinasi longgokan sampah popular atau 'tong sampah' dunia; dan
- (b) pelan tindakan bagi mengatasi permasalahan kegiatan penyeludupan sisa sampah serta hukuman terhadap individu yang mendalangi kegiatan tersebut.

JAWAPAN

Tuan Yang di-Pertua,

JAWAPAN (A)

1. Untuk makluman Yang Berhormat, sekatan oleh negara China berhubung pengimportan sisa plastik import ke negara China pada Januari 2018 telah menyebabkan kebanyakan negara di Asia Tenggara termasuklah Malaysia telah menjadi lokasi baharu pengeksportan sisa plastik untuk dikitar semula. Berikutan itu, Malaysia telah melaksanakan sekatan terhadap pengimportan sisa plastik HS 39.15 pada 2018 (Julai hingga Oktober) dan mengenakan syarat-syarat pengimportan sisa plastik yang lebih ketat berkuat kuasa 26 Oktober 2018 bagi mengawal kemasukan sisa plastik import yang telah menimbulkan kebimbangan kepada rakyat.

JAWAPAN (B)

1. Antara tindakan yang telah dilaksanakan bagi mengatasi kegiatan penyeludupan sisa plastik adalah dengan mengadakan operasi bersepadu bagi mengetatkan kawalan di pintu masuk Pelabuhan Persekutuan bersama-sama dengan pelbagai agensi kerajaan seperti Jabatan Alam Sekitar (JAS), Jabatan Kastam Diraja Malaysia (JKDM), Perbadanan Pengurusan Sisa Pepejal dan Pembersihan Awam (SWCorp) dan Pihak Berkuasa Pelabuhan. Ini termasuk menjalankan pemeriksaan fizikal secara *single inspection* ke atas pengimportan sisa plastik yang diragui statusnya, untuk mengesahkan bahawa sisa plastik tersebut adalah bersih dan homogen. Selain itu, operasi bersepadu di kilang-kilang pemprosesan sisa plastik haram juga masih giat dijalankan bagi menyekat kegiatan penyeludupan tersebut.

2. Bagi kes pemegang permit import (*approved permit* – AP) di bawah Kementerian Perumahan dan Kerajaan Tempatan (KPKT), sekiranya mana-mana syarikat pemegang AP didapati tidak mematuhi syarat-syarat pengimportan yang telah ditetapkan oleh KPKT atau melanggar keperluan agensi-agensi lain terutamanya JAS, AP syarikat akan dibatalkan serta-merta dan syarikat akan di senarai hitam oleh Kementerian.

3. Manakala bagi kesalahan menyeludup sisa plastik, Seksyen 135 Akta Kastam 1967 memperuntukkan denda tidak melebihi RM500,000.00 atau penjara tidak melebihi 5 tahun atau kedua-duanya, jika disabit kesalahan.

Sekian, terima kasih.

**MESYUARAT KETIGA, PENGGAL KEDUA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN
DARIPADA : YB TUAN OSCAR LING CHAI YEW
KAWASAN : SIBU
TARIKH : 14 OKTOBER 2019 (ISNIN)

SOALAN :

YB TUAN OSCAR LING CHAI YEW minta **MENTERI KERJA RAYA** menyatakan pelupusan kontrak PDP dalam projek pembinaan Pan Borneo. Nyatakan jenis pelaksanaan yang baru, dan kelebihan pelaksanaan baru berbanding dengan cara lama. Dari segi kos, berapakah peratusan penjimatan yang akan dibawa oleh pelaksanaan yang baru.

JAWAPAN :

Tuan Yang Di-Pertua,

Selaras dengan usaha Kerajaan mengoptimumkan kos projek-projek yang memberi implikasi yang tinggi kepada Negara, mekanisme pelaksanaan projek Lebuhraya Pan Borneo di Sarawak telah diteliti semula dengan mengekalkan spesifikasi dan skop asal. Berikutan itu Kerajaan telah bersetuju dengan penamatan Rakan Pelaksana Projek (Project Delivery Partner - PDP) dan kos pelaksanaan projek dapat dikurangkandengan tiadanya pembayaran yuran PDP.

Dengan mengambil pendekatan yang sama seperti Projek Lebuhraya Pan Borneo Sabah, Kementerian Kerja Raya dan Jabatan Kerja Raya Negeri Sarawak akan mengguna pakai kepakaran teknikal sedia ada dalam melaksanakan projek secara konvensional. Bagi membolehkan proses peralihan berjalan dengan lancar dan teratur, penilaian terperinci sedang dijalankan bersama syarikat PDP, kontrak Kontraktor Pakej Kerja (*Work Package Contract* – WPC) dan perunding yang telah dilantik untuk memuktamadkan perkara-perkara berkaitan dalam tempoh notis penamatan.

Perubahan model pelaksanaan tersebut tidak akan menjejaskan skop, aspek keselamatan dan kelangsungan projek Lebuhraya Pan Borneo Sarawak sebagai pemangkin pembangunan sektor sosio-ekonomi, perindustrian serta pelaburan di sepanjang jajaran projek tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN MOHD SHAHAR BIN ABDULLAH
[PAYA BESAR]
TARIKH : 14 OKTOBER 2019 (ISNIN)

SOALAN NO. 18

Y.B. TUAN MOHD SHAHAR BIN ABDULLAH [PAYA BESAR] minta **MENTERI KEWANGAN** menyatakan:-

- (a) adakah Kerajaan bercadang memperluaskan inisiatif yang terdapat dalam Dana RM1 bilion untuk Rumah Mampu Milik kepada golongan muda yang ingin membuat pembelian rumah sekunder; dan
- (b) galakan dan inisiatif oleh Kerajaan kepada golongan muda untuk membeli rumah sekunder.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah mengambil pelbagai langkah bagi membantu rakyat terutamanya pembeli rumah pertama, untuk memiliki rumah. Kerajaan melalui Bank Negara Malaysia (BNM) telah mengambil langkah-langkah untuk mengurangkan kos sampingan pemilikan rumah melalui penubuhan Dana Rumah Mampu Milik dengan peruntukan berjumlah RM1 bilion. Melalui Dana ini, pembeli rumah pertama terutamanya golongan muda, akan mendapat pembiayaan daripada institusi kewangan pelaksana melalui kadar pembiayaan yang lebih rendah daripada kadar semasa iaitu sebanyak 3.5% setahun dengan tempoh pembiayaan yang lebih panjang sehingga 40 tahun atau sehingga umur 70 tahun. Kadar pembiayaan yang rendah berserta tempoh pembiayaan yang lebih panjang ini akan meningkatkan kemampuan peminjam untuk akses kepada pembiayaan yang lebih baik di samping mengurangkan beban bayaran balik melalui bayaran balik bulanan yang lebih rendah.

Inisiatif Dana Rumah Mampu Milik ini adalah merupakan kaedah sementara dan harus dilaksanakan secara berhemat dan berhati-hati. Buat masa ini, Dana tersebut hanyalah bagi tujuan pembelian rumah di pasaran utama. Walau bagaimanapun, Kerajaan akan membuat kajian dari semasa ke semasa untuk memastikan Dana tersebut dapat dimanfaatkan secara efektif termasuklah cadangan untuk membenarkan Dana ini dimanfaatkan bagi pembelian rumah di pasaran sekunder.

Untuk makluman Ahli Yang Berhormat juga, Kerajaan lebih memfokuskan insentif bagi pembelian rumah baharu dari pasaran utama (*primary market*) berbanding pembelian rumah di pasaran sekunder (*secondary market*). Ini adalah kerana dalam kebanyakan situasi, nilai dan harga rumah dipengaruhi oleh pemilik atau institusi kewangan pembiayaan yang dicagarkan.

Antara insentif Kerajaan di bawah Kementerian Perumahan dan Kerajaan Tempatan (KPKT) untuk pembeli rumah pertama termasuk golongan belia adalah seperti berikut:

a. Skim Perumahan Mampu Milik Swasta (MyHome)

Skim MyHome menyasarkan pembeli rumah pertama yang berpendapatan isi rumah RM3,000.00 hingga RM4,000.00 sebulan bagi MyHome1 manakala MyHome2 pula dikhususkan bagi pembeli yang berpendapatan isi rumah di antara RM4,001.00 hingga RM6,000.00 sebulan. Pemohon yang layak dan diluluskan akan memperoleh insentif berjumlah sebanyak RM30,000.00 dalam sesuatu pembelian unit rumah yang dibangunkan oleh sesebuah pemaju swasta.

b. Skim Pinjaman Perumahan (SPP)

Skim ini membolehkan Kerajaan memberi pinjaman perumahan kepada rakyat Malaysia yang berpendapatan rendah supaya mereka dapat membina rumah di atas tanah sendiri.

SPP ditawarkan kepada warganegara Malaysia yang berumur antara 21 tahun hingga 70 tahun, belum mempunyai rumah sendiri, bukan pesara atau kakitangan Kerajaan, memiliki tanah atau tanah milik ahli keluarga terdekat serta jumlah pendapatan isi rumah antara RM1,000 hingga RM3,000 sebulan. Pemohon yang layak boleh mendapat pembiayaan sehingga RM60,000 (tidak termasuk perlindungan insurans), dengan caj perkhidmatan sebanyak 2% daripada jumlah pinjaman dan tempoh bayaran balik sehingga 30 tahun atau mencecah umur 70 tahun (yang mana terdahulu).

c. Skim Sewa Untuk Milik (*Rent to Own* - RTO) PPR Dimiliki

Skim RTO dilaksanakan di Program Perumahan Rakyat (PPR) Dimiliki bagi membantu pemohon yang layak tetapi gagal mendapatkan pembiayaan daripada mana-mana institusi kewangan untuk memiliki kediaman sendiri melalui bayaran ansuran mudah untuk tempoh 20 atau 25 tahun. Rumah-rumah PPR Dimiliki dijual pada harga RM35,000.00 seunit di Semenanjung

Malaysia dan RM42,000.00 seunit di Sabah dan Sarawak.

Syarat kelayakan permohonan PPR Dimiliki mestilah warganegara Malaysia berumur 18 tahun ke atas, berpendapatan bulanan di bawah RM3,000 serta belum memiliki rumah. Selain itu, pemohon juga hendaklah memenuhi syarat-syarat lain yang ditetapkan oleh Kerajaan Negeri.

Seperti yang diumumkan dalam Belanjawan 2020 pada 11 Oktober 2019, Kerajaan juga akan mengadakan usahasama dengan institusi kewangan untuk memperkenalkan Skim Pembiayaan Sewa untuk Memiliki (RTO) di mana pembiayaan sebanyak RM10 bilion akan disediakan oleh institusi kewangan dengan sokongan Kerajaan melalui penyediaan jaminan sebanyak 30 peratus atau RM3 bilion. Skim RTO ini adalah untuk pembelian rumah pertama bernilai sehingga RM500 ribu. Di bawah skim ini, pemohon boleh menyewa rumah bagi tempoh sehingga lima tahun dan selepas setahun, diberi pilihan untuk membeli rumah kediaman berkenaan pada harga yang ditetapkan semasa perjanjian penyewaan ditandatangani. Kerajaan juga akan memberi pengecualian duti setem sepenuhnya ke atas instrumen pindah milik di antara pemaju dan institusi kewangan, serta di antara institusi kewangan dan bakal pembeli.

Di samping itu, bagi membantu belia untuk memiliki rumah pertama, Kerajaan akan melanjutkan Skim Perumahan Belia yang dikendalikan oleh BSN mulai 1 Januari 2020 sehingga 31 Disember 2021. Skim ini juga menawarkan jaminan pinjaman sebanyak 10 peratus melalui Cagamas untuk membolehkan peminjam mendapatkan pembiayaan penuh dan bantuan ansuran bulanan sebanyak RM200 sebulan untuk dua tahun pertama terhadap kepada 10 ribu unit rumah.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 14 OKTOBER 2019 (ISNIN)

SOALAN NO. 19

DATIN PADUKA DR. TAN YEE KEW [WANGSA MAJU] minta **MENTERI KESIHATAN** menyatakan adakah Kementerian bercadang untuk membina klinik kesihatan atau hospital di Wangsa Maju memandangkan populasi penduduk di Wangsa Maju adalah sekitar 800,000 orang tetapi tiada satu pun klinik kesihatan atau hospital di kawasan ini.

JAWAPAN

Yang di-Pertua,

Kementerian Kesihatan Malaysia (KKM) sememangnya mengambil maklum akan keperluan untuk membina sebuah klinik kesihatan di kawasan Wangsa Maju bagi menampung keperluan penduduk sekitarnya. Buat masa sekarang, penduduk Wangsa Maju mendapatkan perkhidmatan kesihatan di Klinik Kesihatan Setapak yang beroperasi di Wisma Rampai, Taman Sri Rampai, di bawah kawasan Parlimen Setiawangsa. Dalam masa yang sama, KKM telah pun mempunyai sebuah tapak seluas dua (2) ekar di kawasan Wangsa Maju dan hasil semakan mendapati Klinik Kesihatan Jenis 2 sesuai untuk dibangunkan di atas tapak tersebut. Sehubungan dengan itu, KKM akan memohon perlaksanaan projek ini sebagai salah satu keutamaan untuk dilaksanakan di dalam Rancangan Malaysia ke Dua Belas (RMK-12) akan datang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SERI MAHDZIR KHALID
[PADANG TERAP]
TARIKH : 14 OKTOBER 2019 (ISNIN)

SOALAN NO. 20

Y.B. DATO' SERI MAHDZIR KHALID [PADANG TERAP] minta **MENTERI KEWANGAN** menyatakan penerangan mengenai pelan memulihkan hutang negara dan menyatakan jumlah aset negara yang telah dijual bagi tujuan tersebut.

JAWAPAN

Tuan Yang di-Pertua,

Hutang langsung Kerajaan Persekutuan hanya dapat dikurangkan sekiranya kedudukan kewangan Kerajaan Persekutuan mempunyai lebihan (*surplus*) selepas menampung perbelanjaan pembangunan. Lebihan ini akan digunakan untuk membiayai hutang langsung dan Kerajaan tidak perlu membuat pinjaman. Sebagai contoh, sepanjang tempoh 1993 – 1997, Kerajaan berjaya mengurangkan hutang langsung daripada RM95.9 bilion pada 1993 kepada RM89.9 bilion pada 1997 berikutan lebihan fiskal dalam kedudukan kewangan tahunan.

Dalam memastikan paras hutang Kerajaan Persekutuan terkawal dan terurus, beberapa langkah kawalan berikut perlu dipatuhi iaitu:

- a. Meneruskan langkah konsolidasi fiskal iaitu mengurangkan defisit secara beransur-ansur;
- b. Memastikan perbelanjaan mengurus sentiasa dibiayai melalui hasil negara serta memastikan sebahagian daripada hasil negara tersebut dapat menampung sebahagian perbelanjaan pembangunan;
- c. Mengawal perbelanjaan dan memastikan peruntukan dibelanjakan dengan berhemat, cekap dan berkesan serta memberi penekanan kepada *outcome*, bagi mengelakkan ketirisan;
- d. Pinjaman Kerajaan adalah semata-mata untuk membiayai perbelanjaan pembangunan. Pinjaman ditumpukan kepada perbelanjaan pembangunan bagi projek berimpak tinggi yang akan memberi pulangan kepada negara dan rakyat dalam tempoh jangka masa panjang;
- e. Meneruskan dasar semasa Kerajaan dalam mengutamakan pinjaman dalam negeri bagi memastikan kos pinjaman yang lebih rendah dan murah serta mengurangkan risiko tukaran mata wang asing;
- f. Menambah baik tadbir urus pengurusan hutang dan liabiliti Kerajaan dengan penubuhan Jawatankuasa Pengurusan Hutang dan Pejabat Pengurusan Hutang pada 15 Mei 2019 yang bertanggungjawab untuk mengurangkan hutang dan liabiliti Kerajaan kepada paras yang lebih terurus serta memastikan kemapanan hutang dan liabiliti dalam jangka masa sederhana dan panjang; dan
- g. Mengukuhkan rangka kerja institusi dan perundangan dengan membentangkan Akta Perolehan Kerajaan (*Government Procurement Act*) pada 2020 untuk memastikan ketelusan dan persaingan terbuka dalam perolehan Kerajaan bagi mendapatkan *value for money* serta pengawalseliaan proses perolehan yang lebih efektif. Selain itu, Akta Kebertanggungjawaban Fiskal (*Fiscal Responsibility Act*) dijangka akan dibentangkan pada 2021 untuk mengukuhkan tadbir urus, ketelusan dan akauntabiliti dalam pengurusan fiskal.

Secara amnya, paras hutang langsung Kerajaan Persekutuan tidak akan berkurang selagi kedudukan kewangan Kerajaan Persekutuan mengalami defisit. Sehubungan itu, langkah konsolidasi fiskal bagi mengurangkan defisit adalah amat penting. Kerajaan akan terus membuat pinjaman baru pada setiap tahun untuk membiayai semula hutang langsung yang matang dan menampung perbelanjaan pembangunan. Kedudukan **hutang langsung Kerajaan Persekutuan** sehingga akhir-Jun 2019 berjumlah **RM799.1 bilion atau 52.7%** daripada Keluaran Dalam Negeri Kasar (KDNK), kekal di bawah paras 55% daripada KDNK.

Selain hutang langsung, Kerajaan juga mempunyai **komitmen jaminan yang perlu ditanggung dan dibiayai Kerajaan** yang terdiri daripada tanggungan hutang sebahagian syarikat berkaitan Kerajaan yang menerima Jaminan Kerajaan bagi melaksanakan projek infrastruktur pengangkutan awam dan utiliti. Kerajaan juga menanggung **hutang syarikat 1MDB** serta **liabiliti lain** seperti bayaran pajakan kewangan (*finance lease*) bagi tempoh 2018 – 2047 ke atas projek yang dilaksanakan secara *Public-Private Partnership* (PPP) di bawah Unit Kerjasama Awam Swasta (UKAS), projek yang dilaksanakan secara *off-budget* melalui inisiatif pembiayaan swasta (PFI) dan Pembinaan BLT Sdn Bhd di bawah Kementerian Kewangan. Bayaran *finance lease* ini adalah berdasarkan perjanjian konsesi yang ditandatangani melibatkan obligasi tunai Kerajaan sehingga tahun 2047. Secara keseluruhannya, **jumlah keseluruhan komitmen hutang, jaminan dan liabiliti Kerajaan** dianggarkan melebihi **RM1.1 trilion**.

Pelaksanaan *asset monetisation* dari semasa ke semasa dijangka dapat mengukuhkan lagi kedudukan kewangan Kerajaan kerana menjana pendapatan tambahan. Sejak Mei 2018 hingga Jun 2019, tiada penjualan aset tanah Kerajaan Persekutuan yang telah dilaksanakan. Sebaliknya, Kerajaan terdahulu telah menjual tanah milik Kerajaan Persekutuan tanpa tender terbuka tetapi dengan rundingan terus sebanyak RM4.42 bilion antara tahun 2010 hingga 2017. Kerajaan pasti boleh mendapat pulangan yang lebih tinggi daripada jumlah tersebut sekiranya penjualan dibuat secara tender terbuka.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

DARIPADA : PUAN WONG SHU QI [KLUANG]

TARIKH : 14 OKTOBER 2019 (ISNIN)

SOALAN : 21

PUAN WONG SHU QI [KLUANG] minta **MENTERI KOMUNIKASI DAN MULTIMEDIA** menyatakan jumlah kes aduan diterima oleh Suruhanjaya Komunikasi dan Multimedia sejak pelancaran hotline Whatsapp, jenis kes yang dilapor oleh pengguna serta kes yang telah diambil tindakan oleh pihak berkuasa.

JAWAPAN

Tuan Yang Dipertua,

1. Untuk makluman Ahli Yang Berhormat, Suruhanjaya Komunikasi dan Multimedia (SKMM) dengan kerjasama Polis Diraja Malaysia (PDRM) tidak akan berkompromi dan sentiasa komited untuk mengambil tindakan tegas terhadap mana-mana pihak yang menggugat keselamatan, kestabilan dan keharmonian negara yang menjurus kepada polemik perkauman, agama dan Institusi Beraja.
2. Dalam hal ini, satu jawatankuasa khas iaitu Jawatankuasa Jenayah Siber PDRM-MCMC telah ditubuhkan untuk memerangi ancaman jenayah siber secara lebih strategik dan tersusun terutamanya apabila ianya melibatkan isu-isu sensitif seperti 3R (*race, religion, royalty* dengan izin).
3. Pihak SKMM juga telah mewujudkan satu platform khas penyaluran maklumat insiden atau kandungan sensitif 3R (Platform 3R) pada 17 Ogos 2019 bagi membolehkan rakyat Malaysia memberi maklumat mengenai penyebar kandungan berunsur perkauman,

keagamaan dan menghina institusi Diraja demi kepentingan bersama. Sebanyak **21,296** maklumat telah diterima daripada orang awam melalui media sosial bagi tempoh enam minggu pertama sejak dilancarkan.

4. Daripada jumlah keseluruhan maklumat yang diterima, **19,968** masih dalam proses pengesahan manakala **259 maklumat** yang diterima telahpun diambil tindakan. Antara tindakan yang diambil termasuklah memulakan siasatan terhadap penyebar maklumat berkenaan, laporan penyalahgunaan dan penurunan kandungan dengan kerjasama pihak penyedia platform media sosial, serta rujukan kepada pihak berkuasa lain untuk tindakan susulan. Tempoh tindakan susulan yang diambil adalah berbeza mengikut setiap kes. Penelitian SKMM mendapati **80%** daripada maklumat yang diterima mempunyai kandungan berbaur perkauman manakala **20%** lagi menjurus kepada isu agama.

5. Dalam perkembangan berkaitan, SKMM dengan kerjasama PDRM baru-baru ini telah melakukan serbuan di 14 lokasi di 7 buah negeri iaitu Kedah, Kuala Lumpur, Pahang, Perak, Selangor, Sabah dan Sarawak. Sebanyak 14 suspek yang berusia antara 23 dan 61 tahun itu telah diambil keterangan untuk membantu siasatan kes.

6. Selain itu, pelbagai program pendidikan dan kesedaran giat dijalankan dalam usaha memastikan penggunaan media sosial dibuat secara berhemah. Program Klik Dengan Bijak (KDB) yang diperkenalkan pada 2012 memberi penekanan kepada pembudayaan penggunaan Internet secara berhemah menerusi 3 teras utama iaitu Keselamatan, Kewaspadaan dan Tanggungjawab yang menitikberatkan kawal selia sendiri. Kini, program tersebut telah menjangkaui hampir 5 juta rakyat Malaysia. Di samping itu, portal Sebenarnya.my membolehkan rakyat Malaysia menyemak kesahihan maklumat yang diterima sebelum berkongsi dengan orang lain.

7. Pihak Kerajaan juga mahu mengingatkan rakyat Malaysia supaya bertindak matang dengan tidak memuat naik sebarang mesej berbaur 3R yang boleh mengganggu gugat ketenteraman dan keharmonian awam.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN CHE ALIAS BIN HAMID
[KEMAMAN]**

TARIKH : 14 OKTOBER 2019 [ISNIN]

SOALAN NO. 22

Minta **MENTERI PERUMAHAN DAN KERAJAAN TEMPATAN** menyatakan penjelasan mengenai penjualan rumah mewah kepada warga asing bagi mengatasi lambakan hartanah di negara ini.

JAWAPAN

Tuan Yang di-Pertua,

1. Untuk makluman Yang Berhormat, berdasarkan data Pusat Maklumat Hartanah Negara (NAPIC) bagi Suku Pertama 2019 (Jan - Mac), bilangan rumah mewah tidak terjual yang berharga RM1 juta dan ke atas adalah sebanyak 4,331 unit dengan nilai RM8.7 bilion. Kementerian Perumahan dan Kerajaan Tempatan (KPKT) memberi keutamaan terhadap jumlah ini bagi memastikan unit-unit rumah mewah ini terjual dan tidak menjejaskan ekonomi negara.

2. Justeru, salah satu daripada langkah penyelesaiannya adalah dengan cadangan menjual **rumah-rumah mewah yang tidak terjual ini kepada ekspatriat berkelayakan mengikut mekanisme sedia ada Kerajaan seperti Kempen *Malaysia My Second Home* (MM2H)** dan bukanlah melalui Kempen Pemilikan Rumah *Home Ownership Campaign* (HOC) seperti yang telah dijelaskan dalam kenyataan media KPKT pada 12 September 2019.

3. Program Malaysia Rumah Keduaku (MM2H) merupakan satu inisiatif Kerajaan Malaysia sejak tahun 2002 untuk menarik dan menawarkan peluang kepada warganegara asing yang mempunyai kemampuan kewangan yang tinggi serta memenuhi syarat untuk menetap dan merancakkan ekonomi di Malaysia melalui subsektor pelaburan, hartanah, pendidikan, perubatan, dan automobil. Warga asing yang berjaya menyertai Program MM2H akan diberikan Pas Lawatan Sosial dengan Visa Masuk Berulang Kali (Multiple Entry Social Visit Pass) untuk tempoh 10 tahun dan boleh diperbaharui. Program ini terbuka kepada semua warga asing yang mempunyai hubungan diplomatik dengan Malaysia tanpa mengira kaum, agama, jantina dan umur. Peserta yang layak dibenarkan untuk membawa pasangan dan anak di bawah umur 21 tahun yang belum berkahwin dan masih dalam tanggungan.

4. Program MM2H mensyaratkan bahawa peserta MM2H dibenarkan untuk mengeluarkan sebahagian simpanan dari Akaun Simpanan Tetap yang mandatori untuk tujuan pembelian hartanah bermula pada tahun kedua penyertaan peserta dalam Program MM2H. Oleh yang demikian, rekod pembelian hartanah yang dijana oleh Pusat MM2H adalah tidak menyeluruh dan adalah bersandarkan permohonan daripada peserta MM2H yang memohon untuk membuat pengeluaran simpanan dari Akaun Simpanan Tetap sahaja.

5. Dari tahun 2002 hingga 2018, sebanyak 43,943 peserta telah diluluskan penyertaan ke program MM2H. Berdasarkan rekod, jumlah pembelian hartanah oleh peserta MM2H dari tahun 2007 sehingga 2018 adalah 5,108 unit. Daripada 43,943 peserta yang berada di Malaysia, hanya 15% atau 5,108 daripada jumlah tersebut yang membeli hartanah rumah di Malaysia dan majoritinya adalah daripada China. Peserta hanya dibenarkan membeli hartanah bernilai RM1 juta dan ke atas selaras dengan garis panduan yang telah dikeluarkan oleh Unit Perancang Ekonomi (kini Kementerian Hal Ehwal Ekonomi - MEA) berkuat kuasa 1 Mac 2014.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN KHOO POAY TIONG
[KOTA MELAKA]**

TARIKH : 14 OKTOBER 2019 [ISNIN]

SOALAN NO. 23

Minta **MENTERI PERUMAHAN DAN KERAJAAN TEMPATAN** menyatakan apakah inisiatif-inisiatif perumahan (sedia ada dan yang bakal diperkenalkan) untuk golongan berpendapatan M40.

JAWAPAN

Tuan Yang di-Pertua,

1. Untuk makluman Yang Berhormat, mulai tahun 2019, Kerajaan telah memperkenalkan skim baharu melalui platform penajaan dana masyarakat (*property crowdfunding*) sebagai sumber alternatif bagi pembelian rumah pertama yang dipacu oleh sektor swasta. Dalam hal ini, inisiatif FundMyHome yang diselia oleh EdgeProp Sdn. Bhd. telah diperkenalkan di mana pembelian rumah pertama boleh dibuat melalui bayaran deposit 20% daripada harga rumah dan baki 80% akan dibiayai oleh pelabur lain.

2. Selain itu, skim FundMyHome-Depositku pula menyediakan bantuan pembiayaan sebanyak 10% atau maksima RM30,000 kepada pembeli yang layak. Untuk peringkat permulaan, Skim FundMyHome-Depositku hanya dibuka untuk pembelian Harmoni Apartment @ Eco Majestic, Semenyih yang mana perumahan ini telah siap sepenuhnya dan sedia untuk diduduki.

3. Untuk makluman Yang Berhormat juga, pelaksanaan Skim Perumahan Mampu Milik Swasta (MyHome) telah mula dilaksanakan pada tahun 2014 dan masih dikekalkan pelaksanaanya. Skim MyHome bertujuan membantu golongan berpendapatan sederhana (M40) untuk memiliki rumah berharga tidak melebihi RM300,000.00 melalui insentif pembelian rumah pertama sebanyak RM30,000.00 bagi setiap unit rumah. Skim ini dapat mengurangkan nilai pembiayaan rumah pertama pembeli serta memberi manfaat kepada pemaju-pemaju swasta yang terlibat.

4. Selain itu Kerajaan juga telah memperkenalkan **Kempen Pemilikan Rumah (Home Ownership Campaign - HOC)** sehingga hujung tahun 2019 bersama dengan Persatuan Pemaju Hartanah dan Perumahan Malaysia (REHDA) di mana pihak pemaju akan memberikan diskaun sekurang-kurangnya 10% ke atas rumah yang sedia dibina, dan pihak Kerajaan pula menawarkan pengecualian duti setem. Insentif ini merupakan tindakan lanjutan oleh Kerajaan selepas memberikan pengecualian SST terhadap bahan binaan utama seperti batu-bata, simen, dan pasir, dan juga perkhidmatan pembinaan, dan pihak pemaju memberikan diskaun minimum 10% untuk rumah baharu, dalam usaha untuk mengurangkan harga rumah dan mengurus jumlah rumah yang tidak terjual.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TAN SRI DATUK SERI PANGLIMA
HAJI ANNUAR BIN HAJI MUSA
[KETEREH]
TARIKH : 14 OKTOBER 2019 (ISNIN)

SOALAN NO. 24

Y.B. TAN SRI DATUK SERI PANGLIMA HAJI ANNUAR BIN HAJI MUSA [KETEREH] minta **MENTERI KEWANGAN** menyatakan berapakah pertambahan hutang negara sehingga 30 September dan berapa banyak pinjaman dibuat dalam mata wang asing khususnya Yen Jepun.

JAWAPAN

Tuan Yang di-Pertua,

Kedudukan **hutang langsung Kerajaan Persekutuan** sehingga akhir-Jun 2019, adalah berjumlah **RM799.1 bilion atau 52.7%** daripada Keluaran Dalam Negeri Kasar (KDNK), kekal di bawah paras 55% daripada KDNK. Daripada jumlah ini, sebanyak RM769.9 bilion adalah hutang langsung dalam negeri dan baki RM29.2 bilion adalah hutang langsung luar pesisir. Jumlah hutang langsung meningkat sebanyak RM58.1 bilion berbanding akhir Disember 2018 (RM741 bilion) berikutan Kerajaan perlu menampung pembiayaan defisit pada suku pertama dan

kedua 2019 serta membuat *prefunding* bagi kertas hutang langsung yang akan matang pada dua suku terakhir 2019.

Jumlah pinjaman kasar bagi enam bulan pertama 2019 adalah sebanyak RM81.3 bilion, merangkumi RM31 bilion terbitan MGS, RM36 bilion terbitan MGII, RM6.5 bilion terbitan Bil Perbendaharaan dan RM7.8 bilion pinjaman luar pesisir merangkumi terbitan Bon Samurai dan pinjaman projek. Daripada jumlah tersebut, sebanyak RM23.2 bilion adalah untuk membiayai semula hutang langsung yang telah matang. Baki sebanyak RM58.1 bilion adalah untuk membiayai defisit fiskal Kerajaan berjumlah RM22.4 bilion dan sebanyak RM35.7 bilion pula adalah *prefunding* digunakan untuk membiayai semula hutang langsung yang akan matang dalam tempoh Julai – Disember.

Pada 15 Mac 2019, Kerajaan Persekutuan telah menerbitkan bon Samurai dengan jaminan *Japan Bank for International Cooperation* (JBIC) sebanyak 200 bilion Yen (RM7.4 bilion), dengan kos penuh 0.63% setahun untuk tempoh 10 tahun. Penerbitan bon ini merupakan yang pertama sejak penerbitan bon Samurai yang terakhir pada tahun 1989 dan merupakan terbitan bon kerajaan jaminan JBIC yang terbesar dalam pasaran Jepun.

Selain hutang langsung, Kerajaan juga mempunyai **komitmen jaminan yang perlu ditanggung dan dibiayai Kerajaan** yang terdiri daripada tanggungan hutang sebahagian syarikat berkaitan Kerajaan yang menerima Jaminan Kerajaan bagi melaksanakan projek infrastruktur pengangkutan awam dan utiliti. Kerajaan juga menanggung **hutang syarikat 1MDB** serta liabiliti lain seperti **bayaran pajakan kewangan** (*finance lease*) bagi tempoh 2018 – 2047 ke atas projek yang dilaksanakan secara *Public-Private Partnership* (PPP) di bawah Unit Kerjasama Awam Swasta (UKAS), projek yang dilaksanakan secara *off-budget* melalui inisiatif pembiayaan swasta (PFI) dan Pembinaan BLT Sdn Bhd di bawah Kementerian Kewangan. Bayaran *finance lease* ini adalah berdasarkan perjanjian konsesi yang ditandatangani melibatkan obligasi tunai Kerajaan sehingga tahun 2047. Secara keseluruhannya, **jumlah keseluruhan komitmen hutang, jaminan dan liabiliti Kerajaan** dianggarkan melebihi **RM1.1 trilion**.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SERI ANWAR BIN IBRAHIM
[PORT DICKSON]
TARIKH : 14 OKTOBER 2019 (ISNIN)

SOALAN NO. 25

Y.B. DATO' SERI ANWAR BIN IBRAHIM [PORT DICKSON] minta **MENTERI KEWANGAN** menyatakan berdasarkan laporan media, nyatakan status terkini cadangan perolehan "government fleet" yang kini dikendalikan oleh Spanco Sdn Bhd yang akan ditamatkan konsesi pada tahun ini, berapakah nilai anggaran kontrak, tempoh konsesi dan syarikat pembida yang terlibat dan sejauh mana perolehan mengutamakan penggunaan kenderaan nasional serta nyatakan syarat-syarat dan kelayakan yang diperlukan untuk menjadi pembida.

JAWAPAN

Tuan Yang di-Pertua,

Konsesi penswastaaan pembekalan dan pengurusan fleet kenderaan dengan SPANCO telah tamat pada 31 Disember 2018. Walaupun begitu, konsesi tersebut diteruskan secara interim oleh SPANCO dengan terma dan syarat sedia ada sehingga 31 Disember 2019 atau sehingga Perjanjian Konsesi baharu ditandatangani.

Untuk makluman Ahli Yang Berhormat, keputusan *Request For Proposal* (RFP) Terbuka masih belum dimuktamadkan. Maklumat RFP Terbuka adalah rahsia sehingga keputusan RFP Terbuka dimuktamadkan dan dibentangkan dalam Mesyuarat Jemaah Menteri kelak.

Syarat-syarat dan kelayakan yang diperlukan untuk menjadi pembida telah dinyatakan dalam satu Taklimat '*Pre-Bid*' pada 28 Januari 2019 dan dokumen RFP Terbuka telah dijual melalui atas talian pada tarikh yang sama dan ditutup penjualannya pada 10 Februari 2019.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK SERI HAJI AHMAD BIN
HAMZAH [JASIN]
TARIKH : 14 OKTOBER 2019 (ISNIN)

SOALAN NO. 26

Y.B. DATUK SERI HAJI AHMAD BIN HAMZAH [JASIN] minta **MENTERI KEWANGAN** menyatakan adakah pihak Kerajaan akan menimbangkan untuk memperkenalkan semula sistem percukaian GST memandangkan pendapatan yang berkurangan untuk menampung belanja mengurus dan pembangunan serta rungutan daripada rakyat dan pihak peniaga yang mendakwa kenaikan kos menjalankan perniagaan.

JAWAPAN

Tuan Yang di-Pertua,

Sepertimana Ahli Yang Berhormat sedia maklum, pelaksanaan GST didapati telah membebankan pembayar cukai terutamanya akibat dari kelewatan dalam mendapatkan bayaran balik kredit cukai input yang menjadi kos kepada perniagaan. Pelaksanaan cukai jualan dan cukai perkhidmatan bagi menggantikan GST merupakan mandat yang diberikan oleh rakyat kepada Kerajaan baharu. Oleh itu, Kerajaan tidak bercadang untuk kembalikan GST. Penggantian GST dengan SST telah menyebabkan kadar inflasi turun dengan menyerlah.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIE ANAK MONGIN
[PUNCAK BORNEO]**

TARIKH : 14 OKTOBER 2019 [ISNIN]

SOALAN NO. 27

Minta **MENTERI PERUMAHAN DAN KERAJAAN TEMPATAN** menyatakan senarai projek-projek BP1 2019 berserta jumlah nilai projek yang diluluskan, telah dan sedang dilaksanakan di bawah Majlis Daerah Bau, Majlis Perbandaran Padawan dan Majlis Daerah Serian.

JAWAPAN

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) melaksanakan projek berskala kecil di bawah peruntukan pembangunan di kawasan-kawasan Pihak Berkuasa Tempatan (PBT). Projek-projek ini meliputi 3 skop utama iaitu infrastruktur, kemudahan awam dan sosio-ekonomi. Pada tahun 2019, KPKT telah diperuntukkan lebih kurang RM3.65 juta untuk diagihkan kepada 3 PBT iaitu Majlis Daerah Bau, Majlis Perbandaran Padawan dan Majlis Daerah Serian bagi pelaksanaan projek pembangunan di kawasan PBT.

2. Sejumlah lebih kurang RM1.71 juta telah disediakan bagi melaksanakan 4 projek di kawasan Majlis Daerah Bau, RM937 ribu di Majlis Perbandaran Padawan bagi melaksanakan 4 projek dan sebanyak RM1.01 juta peruntukan telah disediakan bagi melaksanakan 5 projek di kawasan Majlis Daerah Serian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK HALIMAH BINTI MOHAMED SADIQUE
[KOTA TINGGI]
TARIKH : 14 OKTOBER 2019 (ISNIN)

SOALAN NO. 28

Y.B. DATUK HALIMAH BINTI MOHAMED SADIQUE [KOTA TINGGI] minta **MENTERI KEWANGAN** menyatakan adakah Kerajaan berhasrat untuk mengambil langkah-langkah drastik ke atas tanggungan hutang Bon Samurai berjumlah RM7.3 bilion selepas mendapati nilai mata wang Ringgit semakin merosot jatuh berbanding Yen.

JAWAPAN

Tuan Yang di-Pertua,

Perubahan kadar tukaran mata wang asing merupakan antara risiko utama yang diteliti semasa Kerajaan mendapatkan pembiayaan luar negeri. Analisis Kerajaan menunjukkan bahawa Kerajaan akan dapat menikmati penjimatan terbitan bon Samurai berbanding Sekuriti Kerajaan Malaysia (MGS) sekiranya penyusutan mata wang ringgit secara kumulatif tidak melebihi 38.3% berbanding yen. Perlu diingatkan bahawa bon Samurai adalah untuk tempoh masa 10 tahun dan nilai Ringgit dijangka kukuh selepas ekonomi Malaysia pulih daripada skandal kewangan 1MDB. Sehubungan itu, risiko ketidaktentuan kadar tukaran mata wang ringgit berbanding yen adalah masih minimum.

Had statutori di bawah Akta Pinjaman Luar Negeri 1963 adalah RM35 bilion. Sehingga akhir Jun 2019, jumlah hutang langsung luar pesisir berjumlah RM29.2 bilion. Ini menjadikan baki ruang untuk pinjaman baharu sekitar RM5.8 bilion sahaja. Oleh itu, Kerajaan amat teliti dalam melaksanakan sebarang terbitan bon dalam mata wang asing bagi mengurangkan pendedahan risiko terutamanya kepada kebarangkalian penurunan penarafan kredit negara berikutan peningkatan komposisi hutang langsung dalam mata wang asing.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 14 OKTOBER 2019 [ISNIN]

SOALAN NO. 29

Minta **MENTERI PERUMAHAN DAN KERAJAAN TEMPATAN** menyatakan :-

- (a) jumlah lesen pinjaman wang telah dikeluarkan kepada Syarikat atau individu di bawah Akta Pemberi Pinjaman Wang 1951 setakat bulan Ogos 2019; dan
- (b) memandangkan kebanyakan lesen pinjaman telah digunakan oleh “loan sharks” atau “Ah Long” sebagai “front” untuk menjalankan ceti haram, apakah tindakan wajar akan diambil terhadap pemegang lesen pinjaman wang tersebut.

JAWAPAN

Tuan Yang di-Pertua,

SOALAN (A)

1. Untuk makluman Yang Berhormat, sehingga 31 Ogos 2019, sebanyak 4,226 lesen Pemberi Pinjam Wang (PPW) telah dikeluarkan kepada syarikat atau individu di bawah Akta Pemberi Pinjam Wang 1951 (Akta 400) di seluruh negara.

SOALAN (B)

1. Pihak Kementerian Perumahan dan Kerajaan Tempatan (KPKT) memandang serius sekiranya terdapat apa-apa kesalahan yang dibuat oleh mana-mana PPW yang diberi lesen PPW di bawah KPKT. Selaras dengan peruntukan Seksyen 9, Akta 400, KPKT sentiasa memastikan Ahli Lembaga Pengarah syarikat PPW terdiri daripada individu yang berkelayakan, bersesuaian dan beretika. Bagi tujuan pelantikan sebagai Ahli Lembaga Pengarah syarikat PPW, individu-individu tersebut dikehendaki menjalani tapisan polis supaya bebas daripada kesalahan melibatkan jenayah penipuan, ketidakjujuran atau kesalahan di bawah Kanun Keseksaan. Selain itu, individu-individu tersebut hendaklah disahkan oleh Jabatan Insolvensi Malaysia bahawa mereka tidak diisytiharkan muflis. Semakan juga dibuat bagi kesalahan di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 [Akta 613], Bank Negara Malaysia.

2. Setiap PPW adalah diingatkan untuk mematuhi Akta 400 serta peraturan-peraturan yang ditetapkan. Sekiranya didapati mana-mana PPW bertindak dan berkelakuan seperti “Ah Long” seperti mengenakan kadar faedah melebihi had yang dibenarkan, mengenakan kekerasan ataupun ugutan terhadap para peminjam dan menjalankan apa-apa

kegiatan yang melanggar peruntukan Akta 400 dan peraturan-peraturan berkaitan, maka tindakan tegas boleh diambil ke atas PPW tersebut.

3. Bagi kesalahan mengenakan kadar faedah melebihi had yang dibenarkan iaitu 12% setahun bagi pinjaman bercagar serta 18% bagi pinjaman tidak bercagar, PPW boleh dikenakan denda tidak melebihi RM20,000.00 atau penjara tidak melebihi 18 bulan atau kedua-duanya sekali selaras dengan peruntukan Seksyen 17A, Akta 400. Bagi mana-mana PPW yang didapati mengugut atau menggunakan kekerasan ke atas peminjam, PPW berkenaan boleh dikenakan denda tidak kurang daripada RM50,000.00 tetapi tidak melebihi RM250,000.00 ataupun di penjara selama tempoh tidak melebihi 3 tahun atau kedua-duanya. Sekiranya kesalahan tersebut merupakan kesalahan kedua atau berturutan, pesalah boleh dikenakan sebatan sebagai hukuman tambahan selaras dengan Seksyen 29B(1), Akta 400.

4. KPKT sentiasa peka dan mengambil langkah proaktif bagi menangani masalah ini. Sehingga 31 Ogos 2019, sebanyak 606 pemantauan telah dijalankan ke atas PPW di seluruh Malaysia. Sehingga kini, sebanyak 305 jenis aduan telah direkodkan oleh Kementerian dan daripada jenis-jenis aduan tersebut, kesalahan bagi mengenakan kadar faedah yang tinggi ke atas peminjam melibatkan sebanyak 17 kes. Manakala tiada kesalahan direkodkan bagi gangguan atau ugutan kepada peminjam di bawah Seksyen 29B(1) Akta 400.

5. Sehubungan itu, sekiranya terdapat salah laku atau penganiayaan dilakukan oleh syarikat PPW, pihak yang berkaitan dinasihatkan untuk mengemukakan aduan terus kepada Bahagian Kawalan Kredit Komuniti, KPKT.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT MESYUARAT KETIGA,
PENGAL KEDUA, PARLIMEN KEEMPAT BELAS**

PERTANYAAN : LISAN

DARIPADA : DATO' SERI HAJI ABDUL HADI BIN AWANG [MARANG]

TARIKH : 14 OKTOBER 2019 (ISNIN)

SOALAN NO. 30

minta **MENTERI PEMBANGUNAN USAHAWAN** menyatakan apakah usaha Kerajaan untuk menyokong Kempen 'Beli Barangan Muslim Dulu' bagi meningkatkan ekonomi usahawan Melayu Islam Bumiputera.

JAWAPAN

Yang di-Pertua,

1. Kementerian Pembangunan Usahawan (MED) komited untuk menerajui usaha pembangunan keusahawanan secara bersepadu dan inklusif yang merangkumi semua usahawan di Malaysia.
2. Ini meliputi usaha ke arah peningkatan ekonomi usahawan melalui penyediaan ekosistem keusahawanan yang kondusif dan lengkap di bawah Dasar Keusahawanan Nasional 2030 (DKN2030).
3. Kempen "*Buy Muslim First* (BMF)" atau "Beli Barangan Muslim Dulu" merupakan kempen yang dianjurkan oleh Dewan Perdagangan Islam Malaysia sebuah pertubuhan bukan kerajaan (NGO) yang menggalakkan pengguna menyokong barangan dan perkhidmatan yang ditawarkan oleh peniaga-peniaga Muslim di Malaysia.

4. Selaras dengan mandat MED sebagai peneraju keusahawanan negara, Kempen “*Buy Malaysian First*” merupakan medium pemasaran yang terbaik dalam mempromosikan persaingan sihat dalam kalangan usahawan tempatan.
5. Walaubagaimanapun, MED berpandangan penganjuran kempen “Beli Barangan Muslim Dulu” boleh dilaksanakan selagi mana ianya tidak menghalang pembelian produk lain di dalam pasaran. Tambahan pula, kuasa beli barangan dan perkhidmatan terletak kepada pengguna berdasarkan pilihan dan keselesaan masing-masing.
6. Kempen sebegini merupakan platform dalam mengetengahkan dan mempromosi barangan produk Muslim di pasaran tempatan sesuai dengan usaha Kerajaan untuk membangunkan usahawan tempatan dalam industri Halal serta pelbagai industri yang telah dikenal pasti memberi impak yang tinggi kepada usahawan.
7. Pelaksanaan kempen sebegini bukan sahaja membantu golongan PKS malah akan mengukuhkan *supply chain* pasaran produk tempatan secara keseluruhan. Kerjasama pelbagai pihak akan dapat menyumbang kepada pembangunan usahawan dan seterusnya akan meningkatkan sumbangan kepada pertumbuhan ekonomi negara secara keseluruhannya.
8. Dalam hal ini, usaha-usaha yang boleh meningkatkan ekonomi usahawan secara keseluruhannya akan disokong sewajarnya. Antara usaha yang dilaksanakan oleh Kerajaan untuk meningkatkan ekonomi usahawan termasuklah usahawan Melayu Islam Bumiputera seperti berikut:
 - (i) mempergiatkan pelaksanaan program-program *outreach* oleh agensi-agensi Kerajaan dan menyediakan platform kepada usahawan untuk mempromosi dan meluaskan jaringan kerjasama dan pemasaran produk dan perkhidmatan di pelbagai peringkat kebangsaan, negeri atau daerah. Contohnya melalui penganjuran program Expo Halal Malaysia 2019 (MHE 2019), sebanyak 271 usahawan dari 6 kluster utama (*Food and Beverages, Ingredients, Pharmaceutical*

and healthcare, logistic and services, biotechnology and cosmetics) terlibat dalam expo tersebut dengan nilai potensi jualan sebanyak RM135.04 juta telah berjaya dicapai. Melalui program Satu Daerah Satu Industri (SDSI), sehingga September 2019, sebanyak RM28.21 juta potensi jualan telah dicapai melalui 4 siri program SDSI yang telah dilaksanakan di seluruh Malaysia;

- (ii) memantapkan keupayaan dan prestasi usahawan terutamanya Perusahaan Kecil dan Sederhana (PKS) untuk terlibat dalam sektor ekonomi tertentu yang berpotensi dan industri berpertumbuhan tinggi (*high growth industry*);
- (iii) menggalakkan usahawan untuk mempelopori sektor industri berpertumbuhan tinggi dan memacu perusahaan berteraskan inovasi (*innovation driven enterprise*) dan teknologi melalui penyediaan sokongan dan bantuan bersasar termasuklah kepada usahawan Melayu Islam Bumiputera; dan
- (iv) menambahbaik akses kepada sumber pembiayaan yang ditawarkan oleh *Development Financial Institutions* (DFI) dan bank-bank komersial di samping menyediakan platform sumber pembiayaan alternatif serta perluasan pilihan kepada perkhidmatan pinjaman tanpa cagaran bagi memberi peluang dan akses pembiayaan yang lebih kompetitif kepada usahawan untuk membiayai perniagaan yang berskala besar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN CHAN MING KAI
[ALOR SETAR]
TARIKH : 14 OKTOBER 2019 (ISNIN)

SOALAN NO. 31

Y.B. TUAN CHAN MING KAI [ALOR SETAR] minta **MENTERI KEWANGAN** menyatakan berapa orang pembayar cukai kategori individu mengikut banjaran pendapatan bercukai dan diantara ini berapa orang telah membuat tuntutan rebat zakat/fitrah serta jumlah tuntutan setiap tahun berkenaan.

JAWAPAN

Tuan Yang di-Pertua,

Untuk makluman Ahli Yang Berhormat, terdapat seramai 2,349,613 pembayar cukai individu mengikut banjaran pendapatan bercukai di antara RM0 sehingga melebihi RM1 juta yang dikenakan cukai bagi tahun taksiran 2018. Daripada jumlah tersebut, seramai 549,767 pembayar cukai telah membuat tuntutan rebat zakat/fitrah dengan jumlah tuntutan keseluruhan sebanyak RM1.63 bilion.

Melalui peruntukan di bawah subseksyen 6A(3), Akta Cukai Pendapatan 1967, pembayar cukai individu pemastautin yang beragama Islam dibenarkan menuntut rebat cukai pendapatan ke atas bayaran zakat, fitrah atau apa-apa bayaran yang diwajibkan oleh agama Islam yang dibayar kepada pihak berkuasa agama. Jumlah rebat yang dibenarkan kepada pembayar cukai individu adalah dihadkan kepada jumlah cukai pendapatan yang dikenakan bagi sesuatu tahun taksiran.

Layanan cukai yang diberikan ini adalah bertujuan mengurangkan beban pembayaran dua kali iaitu bayaran zakat dan bayaran cukai pendapatan ke atas pendapatan sama.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TAN SRI DATUK SERI PANGLIMA HAJI
ANNUAR BIN HAJI MUSA
[KETEREH]
TARIKH : 14 OKTOBER 2019 (ISNIN)

SOALAN NO. 32

Y.B. TAN SRI DATUK SERI PANGLIMA HAJI ANNUAR BIN HAJI MUSA [
KETEREH] minta **MENTERI KEWANGAN** menyatakan apakah langkah yang diambil oleh Kerajaan bagi memperkukuhkan nilai ringgit yang kian merosot.

JAWAPAN

Tuan Yang di-Pertua,

Sehingga 2 Oktober 2019, ringgit telah menyusut nilai sebanyak 1.5% berbanding dolar Amerika Syarikat. Prestasi ini adalah sejajar dengan pergerakan kebanyakan mata wang serantau lain yang telah berubah nilai dalam lingkungan -7.9% dan 5.6% berbanding dolar Amerika Syarikat. Penyusutan nilai ringgit adalah disebabkan oleh ketidaktentuan berkaitan perkembangan geopolitik, kemerosotan sentimen pelabur dalam pasaran kewangan dunia berikutan kelemahan unjuran pertumbuhan global.

Kadar pertukaran ringgit yang fleksibel memainkan peranan yang penting sebagai penyerap kejutan luaran tanpa menjejaskan aktiviti ekonomi domestik. Namun begitu, volatiliti ringgit yang ketara boleh menjejaskan aktiviti ekonomi berikutan kesukaran sektor perniagaan dan perindustrian merancang strategi dan mengambil keputusan yang wajar. Kerajaan melalui Bank Negara Malaysia (BNM) sentiasa memastikan keadaan pasaran kewangan lebih lancar dan mengambil langkah proaktif dengan memperkenalkan langkah untuk memastikan kecairan yang mencukupi, pasaran yang berdaya tahan dan mengurangkan aktiviti spekulasi dalam pasaran.

Langkah ini termasuk menetapkan syarat supaya sebahagian besar daripada hasil eksport dalam mata wang asing ditukarkan kepada ringgit bagi meningkatkan mudah tunai wang asing dalam pasaran dalam negeri dan meningkatkan penguatkuasaan ke atas peraturan tukaran asing sedia ada bagi mencegah aktiviti spekulasi mata wang ringgit diniagakan di luar pesisir. Pada masa yang sama, BNM telah memperkenalkan instrumen pelindung nilai (*hedging instruments*) dan menyediakan fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN PANG HOK LIONG
[LABIS]
TARIKH : 14 OKTOBER 2019 (ISNIN)

SOALAN NO. 33

Y.B. TUAN PANG HOK LIONG [LABIS] minta **MENTERI KEWANGAN** menyatakan sama ada Kementerian bercadang memansuhkan Cukai Keuntungan Harta Tanah (CKHT) sebanyak 5% atau menurunkan kadar cukai daripada 5% ke 2% atas keuntungan jualan hartanah oleh pemilik individu yang menjual hartanah selepas 5 tahun.

JAWAPAN

Tuan Yang di-Pertua,

Pengenaan CKHT bagi pelupusan hartanah dan saham dalam syarikat hartanah yang dibuat dalam tahun ke-6 dan tahun seterusnya mula dilaksanakan pada 1 Januari 2019. Pada masa ini, Kerajaan tidak bercadang untuk memansuhkan atau menurunkan kadar CKHT ini kerana pelaksanaannya belum genap tempoh setahun. Kerajaan akan menilai keberkesanan pengenaan CKHT ini dan prestasi pasaran hartanah secara menyeluruh.

Seperti yang dibentangkan dalam Belanjawan 2020 pada 11 Oktober 2019, sebagai respon kepada pandangan rakyat berhubung CKHT, Kerajaan akan menambah baik layanan CKHT dengan menetapkan nilai pasaran pada 1 Januari 2013 sebagai harga pemerolehan harta tanah bagi harta tanah yang diperolehi sebelum 1 Januari 2013 berbanding 1 Januari 2000 yang ditetapkan sebelum ini.

Pengenaan cukai ke atas keuntungan yang diperolehi daripada pelupusan selepas 5 tahun pegangan dapat meluaskan asas cukai dan juga membendung aktiviti spekulasi yang memberi tekanan kepada harga rumah.

Bagi warganegara dan pemastautin tetap, CKHT tidak dikenakan ke atas keuntungan daripada pelupusan sebuah rumah kediaman sekali dalam seumur hidup. CKHT juga tidak dikenakan ke atas keuntungan daripada pelupusan hartanah antara suami dan isteri, ibu bapa dan anak, datuk atau nenek dan cucu. Selain itu, pengecualian CKHT telah diberikan bagi individu warganegara Malaysia yang melupuskan hartanah termasuk rumah kediaman kos rendah, kos sederhana rendah dan rumah mampu milik pada harga balasan RM200,000 dan ke bawah dalam tahun ke-6 dan seterusnya.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' HAJI ABDUL RAHMAN BIN MOHAMAD
[LIPIS]
TARIKH : 14 OKTOBER 2019 (ISNIN)

SOALAN NO. 34

Y.B. DATO' HAJI ABDUL RAHMAN BIN MOHAMAD [LIPIS] minta **MENTERI KEWANGAN** menyatakan usaha dan langkah Kerajaan Persekutuan untuk mengurangkan hutang langsung Kerajaan Persekutuan yang saban hari semakin meningkat.

JAWAPAN

Tuan Yang di-Pertua,

Hutang langsung Kerajaan Persekutuan hanya dapat dikurangkan sekiranya kedudukan kewangan Kerajaan Persekutuan mempunyai lebihan (*surplus*) yang mencukupi untuk membiayai hutang langsung dan perbelanjaan pembangunan. Sebagai contoh, sepanjang tempoh 1993 - 1997, Kerajaan berjaya mengurangkan hutang langsung daripada RM95.9 bilion pada 1993 kepada RM89.9 bilion pada 1997 berikutan lebihan fiskal dalam kedudukan kewangan tahunan.

Dalam memastikan paras hutang langsung Kerajaan Persekutuan terkawal dan terurus, beberapa langkah kawalan berikut perlu dipatuhi iaitu:

1. Meneruskan langkah konsolidasi fiskal iaitu mengurangkan defisit secara beransur-ansur;
2. Memastikan perbelanjaan mengurus sentiasa dibiayai melalui hasil negara serta memastikan sebahagian daripada hasil negara tersebut dapat menampung sebahagian perbelanjaan pembangunan;
3. Mengawal perbelanjaan dan memastikan peruntukan dibelanjakan dengan berhemat, cekap dan berkesan serta memberi penekanan kepada *outcome*, bagi mengelakkan ketirisan;
4. Pinjaman Kerajaan adalah semata-mata untuk membiayai perbelanjaan pembangunan. Pinjaman ditumpukan kepada perbelanjaan pembangunan bagi projek berimpak tinggi yang akan memberi pulangan kepada negara dan rakyat dalam tempoh jangka masa panjang;
5. Meneruskan dasar semasa Kerajaan dalam mengutamakan pinjaman dalam negeri bagi memastikan kos pinjaman yang lebih rendah dan murah;
6. Menambah baik tadbir urus pengurusan hutang dan liabiliti dengan penubuhan Jawatankuasa Pengurusan Hutang dan Pejabat Pengurusan Hutang pada 15 Mei 2019 yang bertanggungjawab untuk mengurangkan hutang dan liabiliti Kerajaan kepada paras yang lebih terurus serta

memastikan kemapanan hutang dan liabiliti dalam jangka masa sederhana dan panjang; dan

7. Mengukuhkan rangka kerja institusi dan perundangan dengan membentangkan Akta Perolehan Kerajaan (Government Procurement Act) pada 2020 untuk memastikan ketelusan dan persaingan terbuka dalam perolehan Kerajaan serta pengawalseliaan proses perolehan yang lebih efektif. Selain itu, Akta Kebertanggungjawaban Fiskal (Fiscal Responsibility Act) dijangka akan dibentangkan pada 2021 untuk mengukuhkan tadbir urus, ketelusan dan akauntabiliti dalam pengurusan fiskal.

Tuan Yang di-Pertua,

Kedudukan **hutang langsung Kerajaan Persekutuan** sehingga akhir-Jun 2019 berjumlah **RM799.1 bilion atau 52.7%** daripada Keluaran Dalam Negeri Kasar (KDNK), kekal di bawah paras 55% daripada KDNK.

Selain hutang langsung, Kerajaan juga mempunyai **komitmen jaminan yang perlu ditanggung dan dibiayai Kerajaan** yang terdiri daripada tanggungan hutang sebahagian syarikat berkaitan Kerajaan yang menerima Jaminan Kerajaan bagi melaksanakan projek infrastruktur pengangkutan awam dan utiliti. Di samping itu, Kerajaan juga menanggung **hutang syarikat 1MDB** serta liabiliti lain seperti **bayaran pajakan kewangan** (*finance lease*) bagi tempoh 2018 – 2047 ke atas projek yang dilaksanakan secara *Public-Private Partnership* (PPP) di bawah Unit Kerjasama Awam Swasta (UKAS), projek yang dilaksanakan secara *off-budget* melalui inisiatif pembiayaan swasta (PFI) dan Pembinaan BLT Sdn Bhd di bawah Kementerian Kewangan. Bayaran *finance lease* ini adalah berdasarkan perjanjian konsesi yang ditandatangani melibatkan obligasi tunai Kerajaan sehingga tahun 2047. Secara keseluruhannya, **jumlah keseluruhan komitmen hutang, jaminan dan liabiliti Kerajaan** dianggarkan melebihi **RM1.1 trilion**.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 14 OKTOBER 2019 (ISNIN)

SOALAN NO. 35

TUAN CHARLES ANTHONY SANTIAGO [KLANG] minta **MENTERI KESIHATAN** menyatakan kesediaan Kementerian untuk memperkenalkan ubat HIV dolutegravir (DTG) secara generik atau kurangkan harga ubat ini memandangkan *World Health Organization* mengesyorkan penggunaan dolutegravir (DTG) sebagai rawatan line pertama dan rawatan kedua untuk semua populasi.

JAWAPAN

Yang di-Pertua,

Dolutegravir 50mg Tablet telah mula disenaraikan dalam Formulari Ubat Kementerian Kesihatan Malaysia (FUKKM) sejak 30 Mac 2017 dan telah digunakan di fasiliti Kementerian Kesihatan Malaysia sejak ubat tersebut disenaraikan. Pada masa ini, ubat Dolutegravir masih dalam tempoh perlindungan paten dan dijangka tamat pada tahun 2027. Pihak KKM sedang berunding dengan pihak *Medicine Patent Pool* (MPP) bagi membolehkan Malaysia tersenarai sebagai negara yang boleh mengimport ubat generik Dolutegravir yang lebih murah. Usaha ini adalah penting bagi meningkatkan akses ubat tersebut kepada pesakit HIV di negara ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 14 OKTOBER 2019 (ISNIN)

SOALAN NO. 37

PUAN NURUL IZZAH BINTI ANWAR [PERMATANG PAUH] minta **MENTERI KESIHATAN** menyatakan pelan Kementerian bagi memastikan penyakit mental turut dapat dituntut di bawah insurans bagi menampung kos rawatan dan memperluaskan bantuan memandangkan berlakunya peningkatan kes kemurungan dan “anxiety disorder” daripada 12% pada tahun 2011 kepada 29% pada tahun 2017.

JAWAPAN

Yang di-Pertua,

Masalah kemurungan dan “anxiety disorder” adalah tergolong di dalam kategori penyakit mental yang dipantau oleh Kementerian Kesihatan Malaysia (KKM). Kerajaan sememangnya mengambil berat terhadap peningkatan kes kemurungan dan “anxiety disorder” di kalangan penduduk Malaysia sepertimana telah dibangkitkan. Dapatan Kajian Kebangsaan Kesihatan dan Morbiditi (NHMS) pada tahun 2015 menunjukkan prevalens penyakit kesihatan mental di kalangan populasi dewasa adalah 3 dalam 10 orang dan menunjukkan trend yang meningkat dari 10.7% pada tahun 1996 kepada 29.2% pada tahun 2015. Peratusan masalah kesihatan mental di kalangan kumpulan B40 pula didapati lebih tinggi iaitu 32% berbanding 28% dari kalangan bukan B40.

Untuk makluman, syarikat-syarikat insurans di Malaysia adalah di bawah bidang kuasa dan seliaan Bank Negara Malaysia (BNM) khususnya dalam aspek keselamatan dan kekukuhan kewangan syarikat. Pakej manfaat dalam polisi perlindungan insurans yang ditawarkan oleh syarikat insurans swasta pula adalah berdasarkan perancangan perniagaan mereka dan kelestarian tahap keuntungan yang disasarkan.

Dalam pada itu juga, KKM telah mengadakan beberapa sesi perbincangan dengan beberapa pihak insurans dan mereka sedang mengkaji cadangan untuk memperluaskan perlindungan bagi meliputi rawatan dan intervensi bagi penyakit-penyakit mental berkenaan. KKM sentiasa mengalu-alukan dan menyambut baik sebarang inisiatif syarikat insurans swasta dalam menawarkan polisi perlindungan insurans untuk penyakit kesihatan mental bagi menampung beban kos pembiayaan rawatan, perundingan dan lawatan susulan pesakit mental.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN FONG KUI LUN
[BUKIT BINTANG]
TARIKH : 14 OKTOBER 2019 (ISNIN)

SOALAN NO. 38

Y.B. TUAN FONG KUI LUN [BUKIT BINTANG] minta **MENTERI KEWANGAN** menyatakan kedudukan jumlah hutang negara masa kini, jumlah yang telah dibayar balik dan belum, apakah rancangan untuk melunaskannya.

JAWAPAN

Tuan Yang di-Pertua,

Sehingga akhir-Jun 2019, hutang langsung Kerajaan Persekutuan adalah berjumlah **RM799.1 bilion atau 52.7%** daripada Keluaran Dalam Negeri Kasar (KDNK), kekal di bawah paras 55% daripada KDNK. Daripada jumlah berkenaan, 96.3% atau RM769.9 bilion adalah hutang langsung domestik (50.7% daripada KDNK). Sementara itu, baki 3.7% daripada jumlah hutang langsung Kerajaan Persekutuan atau RM29.2 bilion (1.9% daripada KDNK) merupakan pinjaman luar pesisir. Kerajaan telah membiayai semula hutang langsung yang matang dalam tempoh separuh pertama 2019 berjumlah RM23.3bilion, manakala sebanyak RM59.9 bilion hutang langsung akan matang dalam tempoh separuh kedua 2019.

Selain itu, Kerajaan juga mempunyai **komitmen jaminan yang perlu ditanggung Kerajaan** yang terdiri daripada tanggungan hutang sebahagian syarikat berkaitan Kerajaan yang menerima Jaminan Kerajaan bagi melaksanakan projek infrastruktur pengangkutan awam dan utiliti. Di samping itu, Kerajaan juga menanggung **hutang syarikat 1MDB** serta liabiliti lain seperti **bayaran pajakan kewangan** (*finance lease*) bagi tempoh 2018 – 2047 ke atas projek yang dilaksanakan secara *Public-Private Partnership* (PPP) di bawah Unit Kerjasama Awam Swasta (UKAS), projek yang dilaksanakan secara *off-budget* melalui inisiatif pembiayaan swasta (PFI) dan Pembinaan BLT Sdn Bhd di bawah Kementerian Kewangan. Bayaran *finance lease* ini adalah berdasarkan perjanjian konsesi yang ditandatangani melibatkan obligasi tunai Kerajaan sehingga tahun 2047. Secara keseluruhannya, jumlah komitmen hutang, jaminan dan liabiliti Kerajaan dianggarkan melebihi **RM1.1 trilion**.

Kerajaan tidak pernah gagal dalam menjelaskan bayaran balik dan faedah pinjaman. Kerajaan sentiasa memastikan bayaran pokok dan faedah dibuat secara teratur mengikut jadual yang ditetapkan. Komitmen pembayaran khidmat hutang iaitu bayaran faedah ke atas hutang langsung Kerajaan Persekutuan merupakan komitmen yang diberikan keutamaan sebelum mana-mana pembayaran lain dibuat, iaitu di bawah perbelanjaan tanggungan. Kerajaan telah membuat bayaran balik pokok sebanyak RM23.2 bilion bagi tempoh separuh pertama 2019 melalui pembiayaan semula dan dianggarkan sebanyak RM33 bilion atau 12.5% daripada kutipan hasil dibelanjakan bagi tujuan bayaran khidmat hutang langsung pada 2019.

Bagi memastikan paras hutang dan liabiliti Kerajaan Persekutuan adalah terkawal dan terurus, Kerajaan perlu mengawal perbelanjaan dan memastikan peruntukan dibelanjakan dengan berhemat, cekap dan berkesan.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 14 OKTOBER 2019 (ISNIN)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI KOMUNIKASI DAN MULTIMEDIA** menyatakan bagaimana Syarikat Nuemera (M) Sdn. Bhd. yang dilantik Kerajaan untuk melaksana sistem Sekatan Perkhidmatan Selular Awam (PCBS) gagal menjamin keselamatan 46.2 juta data peribadi pengguna perkhidmatan telekomunikasi sehingga maklumat tersebut terbocor, serta tindakan yang dikenakan terhadap syarikat tersebut.

JAWAPAN

Tuan Yang Dipertua,

1. Untuk makluman Ahli Yang Berhormat, Suruhanjaya Komunikasi dan Multimedia Malaysia (SKMM) dan Jabatan Perlindungan Data Peribadi (JPDP) telah menjalankan siasatan terhadap Syarikat Nuemera (M) Sdn. Bhd. berkaitan insiden tersebut dengan kerjasama pihak Polis Diraja Malaysia (PDRM).
2. Susulan siasatan tersebut, pada 26 Januari 2018, pihak SKMM telah menggantung perlantikan Syarikat Nuemera (M) Sdn. Bhd. (Nuemera) kerana didapati telah melanggar fasal-fasal asas dalam Kontrak Perjanjian di antara SKMM dan Nuemera yang telah ditandatangani. Pada 21 Mei 2018, pihak SKMM seterusnya telah mengeluarkan notis kepada Nuemera atas keputusan SKMM untuk tidak memperbaharui Perjanjian PCBS tersebut untuk tempoh 5 tahun lagi sebagaimana opsyen terdapat dalam Kontrak Perjanjian tersebut.
3. Pihak JPDP telah menjalankan siasatan menjurus kepada pelanggaran 7 Prinsip Perlindungan Data Peribadi di bawah Seksyen 9 Akta Perlindungan Data Peribadi 2010 (Akta 709), pengumpulan data peribadi yang menyalahi undang-undang di bawah Seksyen 130 Akta 709 dan kesalahan di bawah Seksyen 4 Akta Jenayah Komputer 1997.
4. Kertas Siasatan telah dilengkapkan dan dihantar kepada Jabatan Peguam Negara (AGC) dan dalam tindakan pihak AGC.